

增補甘泉縣志

函玖

地 220 117
31
部 = 19

增修甘泉縣志卷九

甘泉縣知縣吳鄂峙 張宏運 王熙泰 原纂

甘泉縣知縣陳觀國 揚州府教授李保泰續輯

甘泉縣知縣徐成敷 桂正華 朱公純 增訂

祠祀下

貞女祠在邵伯鎮北岸俗曰露筋廟乃正德間巡鹽御

史劉澄甫重建萬曆十一年知縣陳邦科增修二十四

年海防副使曲遷喬重修 萬曆江都縣志

露筋廟去高郵三十里 輿地紀勝

祠為甘泉高郵分界地基窪下枕湖面河每逢秋漲

增修甘泉縣志 卷之九 祠祀下 一

常被衝塌屢建屢圮

國朝康熙三十六年知府傅澤洪感夢重修四十六年

聖祖仁皇帝南巡

御書節媛芳躅四大字額懸祠中兩淮運使李斯佺重建

維揚露筋祠土人多稱為露涇西陽雜俎續集載江

淮間有驛俗呼露筋常有人醉止其處一夕白鳥咕

嘍血滴筋露死據江德藻聘北道記自邵白埭三十

六里至鹿筋故老云有鹿過此一夕為蚊所食至曉

見筋因以為名皆不以為貞女事然事可以風即以

為貞女事無傷也 因樹屋書影

蕭荷花祠俗稱露筋娘娘者卽此

徐文長集

米芾露筋碑天地之間雖大體陽況君子陰比小人而五行交相爲功名有正位其龐雜者亦交處於陰陽之間蓋亂臣賊子之所稟婦人女子之所羞雖其粉飾一時班域聖賢明未卽察而陰譴亦不旋踵則澤國之女嚙膚露筋不就有禕之子氏不顯於一時祠方揭於千古庸夫庸婦之所傳稱有如昨日是幽顯之所共信而古今不可得而議者然則伯夷叔齊之節不必俟聖人萬世所自知明矣紹聖元年十月中岳外史米芾東歸道過其下刻石贊曰王化煥猗

增修甘泉縣志

卷之九

祠祀下

二

盛江漢叔運煽猗人倫亂一德彥猗昭世典情莫轉猗天質善楚澤緬猗雲木偃煒斯囿猗日星建

寶晉英光

集

俞德隣宿露筋祠詩午發淮子口晚泊露筋北舟人指靈祠欲語輒歎息伊昔避亂初女郎實英特行行侍邱嫂日暮雲氣黑嫂分宿隣莊我寧止路側我生雖不辰身秉貴弗慙草深聚蚊蟲中夜紛鼓翼映血嚙人膚其毒甚沙蜚女郎不肯顧筋露身亦踣至今是邦人廟貌嚴血食惜哉歲月深姓字不可識維士有百行維女獨四德貞潔一以虧姬姜徒國色所以

古婦人送迎不踰閭嗟嗟露筋事可爲百姓則胡然
世俗人所重在傾國 佩韋齋集

貢師泰露筋祠詩飛蚊撇天連白草落日荒原泣姑
嫂嫂留旁舍姑獨行花顏夜委長淮道亂聲鼓翅腹
正饑利嘴嚼膚血方飽妾行豈不念辛苦死重如山
生似羽欲識當年一寸心廟前老樹啼春雨 貢玩齋集

謝應芳露筋廟詩斷臂孤兒事可悲露筋娘子事尤
奇裙裾不受紅塵污膏血都充白鳥饑野燐照人魂
斷處田家妻嫂睡濃時玉遺香骨天應惜鐵比真心
世共知宿草埋烟迷古塚幽花泣雨倚葭祠碑存米

增修甘泉縣志

卷之九

祠祀下

三

老春秋筆詩有歐公絕妙詞尚待姓名傳國史更看
旌表照門楣古今多少青雲士却忍將身作夏姬 龜巢稿

王夔露筋廟詩淮城小如盎僻在湖草邊蕭條城下
路昔有兩嬋娟秋姿豔明月相攜良可憐小姑泣向
嫂薄暮慘墟烟炎天值暑溽一望白水田穰稔雜良
莠遠與蒲荷連落日帶沙岸滿耳雷闐闐徬徨自相
弔所惜在青年依稀雙影長顧見返照前修途行旅
盡惆悵不能還夏蚊喧且起著面劇霜顫囊空無幃
帳奈此萬鬣穿前村有雞犬燈火見歸船茅茨出叢

薄隱約五四椽匪無有帷子叩門聊息肩嫂云得相
依小姑淚濺濺冰肌與玉體忍委一夕眠風生翠木
下兀兀坐爲禪嚼膚攢利鏃灑血亂幽泉平生弱女
子苦當鷄肋拳肉盡志終定柔筋露蜿蜒森然出天
巧工豈人力鑄含笑化爲鬼攝衣上雲輶素娥共蟾
窟錯落諸星躔天孫下機處一時成俗緣何如作正
鬼心不愧青天終爲臂社珠與月鬪春妍千年露筋
廟野水流涓涓崇祠闖水裔蛛絲縈几筵明粧儼如
昨彷彿步湖蓮神柳剝將枯獨有心中堅垂柳自婀娜
不受惡藤纏年年臘雪後葉綻翠眉鮮鄉人枌榆

社日有牛羊牽唯聞綵繒饗紙傘散金錢神往女巫
下妙舞特踰躑車旗颯靈雨簫鼓咽秋蟬祇愁神返
駕不得此周旋焮蒿古時魂猶記草中鈿歸來不見
嫂遠道正綿綿嫂面有糞土長淮終不渝分明小姑
面留與後人傳米生性好古書字無半千至今麗牲
石苔蘚澁蝸涎碑言天地間陰陽互推遷陽類況君
子小人陰類偏五行有正位變化歲功全云胡值龐
雜交處薦成愆亂賊所稟性狐媚最便嫁潛如蟻與
虱動乃百足蚘奄忽爲魍魎鬼箭脫神弦赤手賣天
下性命徒少延揚揚服袞黼班域在聖賢婦女尙知

赧奈何欺八埏明雖未卽察陰譴固昭然唯餘澤國
女白骨寄荒阡姓名何必顯有此大義懸清風起懦
夫未讓夷齊專事歌楚人些斯罔日星宣我觀碑上
字滿紙秋淪漣共姜賦栢舟名芳刪後編春秋偉宋
姬身與火蛾煎後來有此碑砧石當犇川隔江望高
郵野水惟睢鳶憂來忽盈抱寫此露筋篇

三近齋稿

劉炳經露筋祠詩珠湖烟雨散晴暉帆落風輕短棹
遲春草斷垣斜日裏行人猶說露筋祠

春雨軒集

張吉露筋烈女祠詩佳人翠袂映幽竹風鬟霧鬢清
如玉崎嶇一棹長淮曲客子薄暮歌死鹿盍離毒嘖

增修甘泉縣志

卷之九

祠祀下

五

卽裊裊此身擔死不受辱天黯慘鬼神哭羅襦錦帶
深結束泉源斷絕貞心暴姓名不假青史錄柔弱在
貌剛滿腹幽光萬古照祠木男兒忍使綱常覆過此
不知何面目哀哉此輩真禽犢

古城詩集

齊之鸞露筋廟限韻詩道傍女子死於蚊猶聽居人
說露筋古木荒祠來夜月清風巍碣罩秋雲事傳汗
簡遺名氏血染羅衣駭見聞湖上貞魂千載恨齋宮

白鳥謾紛紛

蓉川集

薛應旂露筋烈女祠詩烈女祠前青草深斷碑猶自
倚湖陰千年蘋藻憑誰主萬古綱常祇此心降虜李

陵空仗劍歸朝蔡
玫瑰愧囊琴側身
天地應難數獨對
長河恨不禁

方山全集

程文德過露筋祠詩在昔有處女避寇湖中居深夜
水昏黑茂草蚊若蝮湖旁豈無舟同伴亦且驅從舟
卽從寇寧爲蚊所屠有身筋可露偷生死不如吁嗟
烈女心男兒空珮琚人生不自愛千年日月虛至今

瞻烈女凜凜肅裙裾

松溪文集

徐渭蕭荷花祠詩荷花一夕凋萬里秋無色獨遺花
烈芳千秋襲陂澤揚船遡大湖風緊日已夕水鳥集
舊栖戢羽茭菰白弔古解維舟去岸不盈尺秉燭褰

增修甘泉縣志

卷之九

祠祀下

六

繡幃金翹儼宮額燭滅颯然中神爽凜孤魄念此芒
吻微奚啻雄虺索豈無冶容膏貞肌以爲矐念茲不
能忘惆悵至明發 又露筋祠詩烏鳥旣能傷義士
蚊虻何苦碎貞肌由來天道本無定誰使昆蟲必有
知畫壁幾殘春社雨靈風時滿夜歸旗烟波一望三
千里長在湘湖洛水湄

徐文長集

錢謙益露筋廟詩露筋夫人明且賢周南三復行露
篇血肉朽腐任啖咋冰心玉骨終皎然炎風火雲滿
天地長夜漫漫何處避貞女能將軀命輕飛蠶自得
齒牙利君不見花鷹宿鴨動成羣暮拍朝驅愁殺君

高郵湖水通平望更有吳興豹脚蚊

初學集

于鍾元過露筋祠詩定證無生向法王剜身不復費
商量數聲渴雁當離髻一片神鴉掠去檣荒廟烟煤
雖斷絕殘粧巾帔尙飄揚涼秋邵伯湖邊過懷古奚
堪對夕陽

秋蟀集

陸君弼露筋祠詩古廟遺名氏蕭條湖水濱露筋空
往事雪涕自行人山霧羅巾薄庭花玉貌新南宮詞
不媿堪與表貞珉

正始堂集

吳本泰露筋祠詩晨發自邗關夕舂此艤櫂春風悲
人心寂默荒祠弔落日短草黑古木饑鳶叫漫滅襄

增修甘泉縣志

卷之九

祠祀下

七

陽碑安知黃絹妙貞魂淒鐵石雲月留其貌剪紙不
可招夜迴明原燒陰廊肅靈籟清漪澹相照江妃與
漢女水花倚一笑

吳吏部北遊集

范鳳翼謁露筋祠詩茫茫大塊間嶽嶽一女子崇祠
肅清高遺像儼如此女生罹不辰烽烟四郊起偷生
非所甘委身道旁死香血灑平蕪玉骨湛秋水孤標
白日寒勁節狂瀾砥高風憬來禛身譽留青史我來
欽貞淑感歎曷能已世間無丈夫頽綱何足齒

范勛
卿集

劉中柱露筋祠詩風逆且停帆荒祠近水南藤蘿纏
斷碣蝙蝠出空龕湖氣涵虛白天光下蔚藍千秋貞

魄在靈響報瞿曇

畫隱詩鈔

王翊露筋祠詩野岸風流截海垠安歌誰復賽波神
孤舟夜向寺前泊商女挑燈說露筋

秋槐堂集

王士徵露筋祠詩放舟湖上水橫櫂女郎祠往蹟行
人說清風古牒垂畫衣生積蘚荒徑颯靈旗叢竹香
蘋路依稀近九疑

漁洋詩鈔

又再過露筋祠翠羽

明璫尚儼然湖雲祠樹碧於烟行人繫纜月初墮門
外野風開白蓮

精華錄

汪琬過露筋祠詩湖水渺無際古祠臨釣磯藕花漸
蕭颯楓葉生芳菲一二白髮巫裘回倚門扉陰廊竄

增修甘泉縣志

卷之九

祠祀下

八

鼯鼠畫壁生伊威豈無佑客舟來酌椒漿稀靈兮秉
貞素獨處誰相依羞比青谿姑願效黃陵姬山鬼雖
陸梁敢窺坐上幃我茲訪遺蹟日落烟霏霏輕埃侵
綠鬢寒吹卷綃衣環珮了不聞徒然想音徽

鈍翁詩類稿

施閏章露筋祠詩野死無名氏千年廟獨存自然堪
下拜不用賦招魂風月清傳珮蘋蘩香遶門往來纓

冕客慚歎向誰論

愚山先生集

嚴繩孫露筋祠詩青史名何在荒祠一水間白雲中
婦意清露小姑顏獨灑鵲邊血俱添竹上斑恥論蟬

冕事回首拜雲鬢

秋水集

田雯露筋祠詩黃頭高唱水程長
臂社風來菡萏香
向夕露筋祠下過土垣瓦屋一垂楊

山薑詩選

邵長蘅雨泊露筋祠詩邵伯埭下雨如絲貞女祠邊
繫纜時萋萋碧草歸人晚淼淼空湖去鳥遶水面人
家浮雁鶩灣頭艇子立鷓鴣風扉破壁淒涼甚扶屐
還來問古碑

青門旅稿

王式丹露筋祠歌噫吁嘻我不知烈女何代人傳到
於今幾千春亦不知烈女何名復何姓惟有露筋二
字傳其真其初傳之田夫野老口後來學士大夫詩
歌贊頌萬口如一層憶昔嫂與姑中夜走荒途秋蚊

增修甘泉縣志

卷之九

祠祀下

九

密如霧利喙嚼柔膚嫂投田舍豈必不自保姑縱隨
之豈肯爲人污而乃皎皎中天日湛湛一泓水決不
令微塵點翳畧近清白軀當時但取自潔淨豈其有
意爲名乎無意爲名名所趨萬古歌頌如此女者真
絕無作謂自誰氏歐公倡其始海嶽實繼之後起騰
萬紙前明張珩一闕最奇崛我朝新城王公風雅真
罕比其餘作者妍媸雖各殊大抵表貞揚烈皆可訓
俗礪廉恥紅祠何峨峨乃在湖之涘接檐敞飛甍闕
院夾重庀明之嘉靖年中所修葺百五十載以來日
傾侈巖湖直瀉萬頃波潏沆四圍齧其趾幾叢瓦礫

散蓬蒿幾度昏鴉噪秋水異哉烈女有神靈靈旗夜
下廣陵城髮髻冠帔儼天仙青鸞白鳳相逢迎廣陵
太守夢中見親承嘉命鳩工程一修不已又增修煥
然復舊觀崢嶸歷代標題盡洗刷一一丹黝陳兩楹
磨礪大石鐫古篆賢哉太守留其名我來瞻遺跡俛
仰三歎息肅拜具衣冠冰霜照顏色胖蠻仞佛宮有
血幽通眞宰關神力似此流芳萬千億上帝當加褒
朝廷當賜敕何但區區一郡士女所矜式噫吁嘻湖
水無時涸河隄日脆薄

聖主憂民憂南顧誰付託烈女之神貫天經亘地絡既能示

增修甘泉縣志

卷之九

祠祀下

十

夢新厥宇豈不能請命上帝障此波臣虐朝廷歲費
百萬金錢填此無窮谿與壑何不刑牲沉玉祈神庥
一如天妃元君配位泰山與海若噫吁嘻我本災餘
民忽發狂言瀆明神神聽吾言不吾嗔四拜旣畢出
廟門茫茫湖水天黃昏孤舟一葉纜墻根春來猶見

舊潮痕

樓村集

彭定求露筋廟行森森邗溝水茫茫楚澤雲宛在嬋
娟宮行人瞻望頻昔來廊廡圯今來楹棟新艤舟載
延竝迴若藐姑神千載海嶽碑抉摘名義眞陰陽氣
龐雜貞脆殊蕪薰矯哉瓜李嫌之子耽清芬節與夷

齊埒片語扶千鈞巫山洛水間賦筆蒙埃塵藉此一
驅蕩仰追王風澹未須歌楚曲橫涕招湘君

南畝集

陳維崧題露筋祠露筋祠下寒蓬渺渺去何之停橈
一問靈旗怙悵千年古廟陳跡幾人悲只風前燕子

雨後棠梨 俯仰歔歔憑弔處更憐誰惟有淮陰漂
母一樣蛾眉估船爭泊問何人拂蘇一題詩依稀見

玉佩珠衣 瑶華集

太傅謝公祠在邵伯鎮 嘉靖江都縣志

甘棠廟即安祠也 元豐九域志

歲久廟圯鎮民肖像於五聖祠前殿明嘉靖六年給

增修甘泉縣志 卷之九 祠祀下 十一

諫彭汝實改題其額曰東山書院隆慶元年督學使
者耿定向檄揚州知府遷安像居後殿國子監監丞
沈珠為碑記而五聖祠未毀

國朝康熙二十三年江蘇巡撫湯斌毀治內五聖祠乃
改祀三官於前殿仍以後殿祀安

沈珠遷晉太傅謝公像記一統志揚郡城東北四十
五里甘棠廟祀晉太傅謝公安述公淮淝捷後權奸
扇搆出鎮廣陵築壘曰新城相視步邱地勢西高湖
水洩嘗苦旱東漸下湖漲沒農田為築埭以界之民
享其利立廟祀之稱曰甘棠蓋比之召公斯鎮與湖

皆以名歲久廟壞鎮民戴紀輩飾像置五聖前堂隆慶改元夏五月督學使耿公試士海陵珠追隨及鎮館於廟覩太傅像肅然曰先賢奚置是務正位於堂始稱乃檄揚郡守衛侯侯下之江都尹方侯亟遷後殿遂以公命問記於珠珠考之晉書太傅處大事決大疑當大難成大功咸不動聲色尋常談說施措一曲中其在官無當時譽去後爲人所思邵伯埭其一端也禮有功德於民者無廢祀督學公特爲遷定其位夫固洽埭人之心而愛戴太傅於無窮也

西溪文集

羅令祠在邵伯鎮一曰明王廟祀宋江都令羅適嘉靖

增修甘泉縣志

卷之九

祠祀下

十三

四十一年知縣趙訥重修

萬曆江都縣志

秦觀羅君生祠記羅君之爲江都也以誠心爲主恥言鈎距惠文之事凡民有訟曲直徑決於前不以屬吏註誤若小過輒誨諭遣去視鰥寡孤獨之有失其所者如已致焉黎明視事入夜猶不已或譏其太勞君曰與其委成於吏民有不盡之情孰若勞予之耳目哉居數月政化大行民知其長者不忍欺給之訟者益少君乃出行諸郊所過召其耆老問以疾苦及所願欲而不得者爲罷行之始復大石湖改名元豐廣袤數百步溉田千有餘頃是歲大穰畝收皆倍於

是遠近自陳願復陂塘溝渠之利者相屬君一切聽許親至其地與之經始築大隄以却潮之患疏潦水而注諸江凡水利之興復者五十有五漑田六千頃而桑之以顆種者亦八十五萬有奇徙其治於東南爽塏之地爲屋數百楹以其贏材新驛堠亭館之在境者又頗出私錢營諸藥劑以給疾病之民所瘡至不可勝計歲或乾溢有禱羣祠雨暘輒應如響世益謂神其享之歲滿代去其民思之不置乃聚而謀曰我民之德羅君至矣顧無以自效聞古有召伯者善治民民追思之至不忍伐其所憇之棠又有謝公者

亦其流也嘗以斯城北築埭後人因名其埭曰召埭今埭實在江都之北境蓋卽其地堂畫羅君之像而祠之以慰吾民且曰使羅君之名與召謝共傳而不朽不亦可乎眾曰善於是卽召埭之東法華佛寺置生祠焉羅君名適字正之台州甯海人學術有本末通於世務風節凜然國士也嘗再被召見皆以不合罷歸其立官行已所可書者甚多書在江都者以爲

生祠記云

淮海集

恭愛廟在陳公塘側祀漢廣陵太守陳登宋熙甯間建

江南
通志

孫侔重修恭愛廟記漢建安中廣陵太守陳侯登字元龍居郡有異政沈勇內決總眾多威畧侯所治當東南之溱土俗勁剽物產蕃侈方是時皇綱弛絕亂臣相與犯上天下紛擾雄豪並起袁曹虎眈許鄴昭烈拔迹小沛呂布暴桀下邳桓王經略江表侯鎮是邦挺然自固武力旣宣疆場不驚法修教浹人趨厥務稚老鰥寡愉愉嬉嬉侯以休暇行城之西二十里濬源爲塘用拯旱饑有菑有葦龜浮魚游民資以饒漑浸田疇稻秔豐稊勤本足食廬井恭而愛焉名傳於今以褒厥廟寅寅處事四時報饗殆將千載而莫

敢忘古之所謂有功者得其所以濟民則懷悅當時遺後世無窮之澤此爲政者所勸勉也宋興大中祥符六年始析唐之白沙鎮附以二縣置眞州爲江淮制置發運治所而塘實在其地歲用灌注長河增淺宣淤渟然流通漕轉弗乏其利彌廣矣於是官輸民賈物貨粟帛四方使客千艘萬軸雷動而雲集故於淮之南爲州最劇熙寧五年太常少卿陳留羅道濟及尙書度支郎中河南皮憲臣公弼爲之使慨然追侯之功治愈久而利視祠之不嚴命加完飾使里俗益知侯之德遠不可怠而顯章之以信於後且請余

文紀焉

康熙揚州府志

關王廟除府縣秩祀三處外一在濱武場東南隅一在小東門甕城內俱明嘉靖間建萬歷江都志一在西門二半鋪明崇禎二年建一在城西北二十里北方家巷康熙初建

文昌宮一在南門新橋一在府縣儒學內其餘在鄉鎮者無古蹟碑文俱不勝載

三義閣在新城永盛街東初名關侯廟明時建國朝康熙四十二年僧深玉重修增祀昭烈張桓侯因更今額

增修甘泉縣志

卷之九

祠祀下

五

火星廟一在三元巷後曰炎帝宮每年六月二十三日府縣致祭一在北門街東一在中所一半鋪一在天甯坊天啟中建一在司前三鋪洪武中建一在馬監前洪武三年建一在西門二半鋪崇禎五年建一在西門頭半鋪順治中建一在北倉前順治八年建

神姓宋名無忌漢時人也生有神異歿而爲火精唐牛僧孺立廟祀之以禳火災廟在武昌府之城東七里本曰宋大夫楊吳避諱改稱大憲按唐韋建除武昌軍節度使將行夢一朱衣達者導從數十輩昂昂然詣韋曰公將鎮鄂渚僕所居頽毀非公不能葺治

及至訪無忌廟即夢中所見遂鼎而新之今江東各所之火星廟皆其神也

增補搜神記

都天廟一在新城蜿虹橋一在縉紳坊一在北門外半鋪一在東西兩園一在善應鄉一在上雷塘相傳隋時建一在下雷塘

國朝康熙四十年重建

神醫廟在太平橋下漢末華佗神於醫揚人祠焉俗名

華大王廟

嘉靖江都縣志

明成化己亥進士馬岱以赴省試邁疾夢神治之痊而獲雋貴顯後請以家祠建今廟

增修甘泉縣志

卷之九

祠祀下

去

廣陵太守陳登得病胸中煩懣面赤不食佗胗之曰府君胃中有蟲數升欲成肉疽食腥物所爲也即作湯二升食頃吐出三升許蟲赤頭皆動半身是生魚膾所苦便愈佗曰此病三期當發依期果發時佗不在如言而死

三國志本傳

二郎廟在大東門外大街北正統間建祀二郎神趙昱今以關壯穆侯配左三官閣邑人章泮建

萬歷江都縣志

國朝雍正壬子重修

趙昱字仲明與兄冕俱隱青城山從學道士李珏隋末煬帝知其賢徵召不起督讓益州太守臧賡強起

昱至京師煬帝縻以上爵不就獨乞爲蜀太守帝從之拜嘉州太守時健爲潭中有老蛟爲害日久截沒舟舩蜀江人患之昱蒞政五月有小吏告昱會使人往青城山置藥渡江溺死者沒舟航七百艘昱大怒率甲士千人及州屬男子萬人夾江岸鼓噪聲振天地昱乃持刀沒水頃江水盡赤石崖半崩吼聲如雷昱左手執蛟首右手持刀奮波而出州人頂戴事爲神明隋末大亂潛以隱去不知所終時嘉陵漲溢水勢洶然蜀人思昱頃之見昱青霧中騎白馬從數獵者見於波面揚鞭而過州人爭呼之水遂吞怒眉山

增修甘泉縣志

卷之九

祠祀下

七

太守薦章太宗文皇帝賜封神勇大將軍廟食灌江口人呼灌口二郎歲時民疾病禱之無不應上皇幸蜀加封赤城王又封顯應侯昱斬蛟時年二十六珽傳仙去亦封佑應保慈先生

龍城錄

小司徒廟一在右所頭一在東關

五顯司徒廟在城西北平山堂右洪武十六年重建正統成化間相繼修嘉靖六年巡鹽御史雷應龍毀之立胡安定先生祠後土人復立廟於祠東

萬歷江都縣志

國朝雍正十一年春雨傷麥知府尹公會一過廟祈禱立霽入夏彌月不雨禾將枯又虔告於廟甘雨大沛因

陳牲報言焉

揚州英顯司徒茅許祝蔣吳五神居揚州日結爲兄弟好畋獵其地舊多虎狼人罹其害山豁畔遇一老婦五神詢問子然無親饑食溪泉五神請於所居之廬拜呼爲母侍養未久或出獵而歸不見其母五神曰多被虎噉俱奮身逐捕山間有虎迎前伏地就降由此虎患始息後人思其德義立廟祀之凡所祈禱隨求隨應廟今在江都縣東興鄉金匱山之東至隋煬帝時曾護駕有功封號司徒唐加侯號至宋紹定辛卯逆賊李全數來寇境禱於神不吉以神像割破

增修甘泉縣志

卷之九

祠祀下

六

之不三日全被戮於新塘肢體散落猶全之施於廟者賊平帥守趙公范親率僚屬致盲祠下以荅神貺撤其廟而增廣之錄其陰助之功奏請於朝賜額曰英顯加封至八字侯後平章賈公似道來守是邦有禱於神者遇旱暵則飛雨憂霖潦則返照救焚則燄滅故雪則瑞應其護國佑民無時不應復爲奏請加封王號

增補搜神記

廣陵之墟有五子廟云是五代時羣盜嘗結義兄弟流劫江淮間衣食豐足皆以不及養其父母爲憾乃求一貧嫗爲母事之甚孝凡所舉惟命是從因化爲

善鄉人義之歿後且有靈異因爲立廟菽園雜記

王琳被殺故吏朱瑒劉韶慧等持其首還於淮南尋有揚州人茅知勝等五人密送葬柩達於鄴北齊書本傳

按搜神記所云似屬傳聞不根之語陸君弼引王琳傳爲五神証據於事理頗合但云梁書則誤耳梁書無琳傳也

吳秀司徒廟碑余素守尼父敬遠之訓官維揚間過蜀岡有頽廟曰司徒父老磔鷄刺蕪焚香拜走其宮不絕是時倭奴方嘯聚鳴鏑維揚密邇海徼吏民莫不憂怖余縮郡符當任吏民憂一日余與同寮登其

廟息焉見司徒五人之哦然袍笏簪纓勃有生氣不覺起敬遂以籤卜之吉諸君子亦莫不嘖嘖稱異謂平山余別號若司徒呼而相語詎不神哉俱頓首瞻仰始讀王公應鳳金公獻明所撰碑知五人爲五姓其一卽前所徵夢蔣王也生平任俠者流自東晉陳梁時迄今而神此何以說也蓋天地間惟正氣不容磨滅司徒五人結交爲兄弟母事溪旁媪媪爲虎所啖五人力捕之虎卒馴而就降其事雖非中庸殆得正氣之多者與五人雖好獵必其人精悍強猛志在控騶淬銳卒齋志以沒則其氣盤鬱不伸故屢著異

迹而不泯泯未可知也乃召父老之礫鷄刺豕焚香
奔走其宮者而詢之俱曰水旱疾疫禱輒應又曰嘉
靖三十五年倭兵蹂維揚至西北興隆橋東五神魁
梧衣絳持斧立橋上倭遂俯伏而退夫倭兵犯境能
陰退之以免民於兵燹今倭復告急能先示之兆使
民不致甚眩惑驚怖則靈未嘗不爲民禦災捍患假
今遇狄梁公亦必世世血食之於是新其宇以彰厥
靈從民意也

芙蓉集

王猷定重修五司徒廟碑揚州神異傳五司徒與蔣
子文並傳神茅姓勝其名與許祝蔣吳四姓結爲兄

增修甘泉縣志

卷之九

祠祀下

三

弟忽溪旁見一嫗遂迎歸以母事之不知其非所自
出也饑虎食其母五人奮力殺之地無虎患州人思
德爲立廟隋封司徒侯爵及宋紹定中驅李全礫新
塘明世宗三十有五年護郡民匿彤檐中着金鎧持
斧立橋上島夷顛仆弗卽逞尤異者歲旃蒙作噩寇
窺城筮諸神斫牙旗旗折而賊壓焉人以爲神世德
於揚也爭修廟社以崇報云

西照堂集

宗元鼎司徒廟詩降監道不昧感通屬至理諸君試
靜坐聽吾言疊疊廣陵有靈神司徒君茅氏茅君生
六朝世亂居於此許祝與蔣吳共結爲兄弟慷慨喜

畋獵義氣重閭里山中老媪賢五人孝如子是時多
虎患白日踞於市一朝畋獵歸家已失其母必爲虎
所啖奮力捕山阜入穴盡殺之自是除虎禍土人思
其德刺史立廟祀隋封爲司徒侯爵光樽俎迨至宋
紹定李全亂復起卜於神不吉跋扈將廟毀全敗走
新塘眾殺裂肢體叛賊不忠徒明神賜速死能保此
疆界以爲宋室有趙范新其廟丹飾煥淮海賜額曰
英顯表其功烈美後復加王號考自寶祐始其廟在
蜀岡至今千年矣正氣肅乾坤威靈降福祉東城有
行宮儀範亦濟濟從來建午月獻牲陳酒醴四時亦

增修甘泉縣志

卷之九

祠祀下

三

不絕鐘鼓動祝史所貴在寅清豈徒在簠簋爲境除
禍災爲時順風雨士民遇急難默禱卽爲解生平有
實驗非僅爲虛擬憶昔墮盜舟眈眈疾相視脫我於
厄塗終免啣虎尾齋戒謝仁慈俚詞綜源委聊備史
官求敢云大雅比

芙蓉集

邗溝廟在城北三里邗溝之陽大觀圖經謂祀邗溝神
今肖像衮冕傳其神爲吳王夫差

萬歷江都縣志

金龍四大王廟在東關外黃金壩西岸

五龍廟在九曲池今廢城西七里店有龍王廟相傳禱
雨著靈

陳造維揚龍廟記五龍血食於揚肇自國初而備嚴於今屹然爲一郡乞靈之地按圖志藝祖皇帝之破李重進也駐蹕九曲池上有龍鬪於池事已乃廟祀之其後廟廢第繪像於建隆僧舍其廟之故基與夫不廟而像之故漫不可考慶元五年帥郭侯某復屋之於池之西偏至嘉泰之二元今待制趙公來制帥閩早涸告病禱而雨歲以中熟慨念水枯早暵挽回豐穰非龍孰致之而訪視所建庫陋甚人莫起敬惕不敢安乃移爲今祠居有殿獻有亭更衣有所爲屋各三間別爲門而垣之掄才而堅良選貢院之餘也擇

地而亢爽宅震面兌兌澤震龍廟則宜也附佛宮主香火以僧欲其專也遠邇聞見奔趨畏敬祠祭祈報無或敢怠始其經度也或告九良星在焉盍緩之公一夕夢人頎而髯顴聳而色瑩黃袍而黑緣捧赤土龍笑授公公許卽爲立祠旦則鳩工庀材不日而崇成迎奉之辰晴日麗空遊雲蜚雨滃鬱廟廷公親書廟額以揭殿顏是日飛雲薦瑞邦人聳觀其靈異昭著如此夫仁民而爲聖賢澤物而爲龍相異而相同相須以濟其所不及天命之也而聖賢又龍所依惟五龍顯異於昔朕夢於今效啟聖之符而致濟世之

功惟公積而德敷而政其信於君孚於民者俯仰無愧故有請於龍若桴鼓若影響惟其必諸已故能必諸冥漠儻况之表不幸而水若旱惟無禱也彼且畧於已詳於龍吁其難哉公謂某粗知文者使之志龍之惠利廟之廢置庸詔永久辭不獲遂以公之所示而紀之且述其所以媚於龍者詩而碑之其詞曰五龍顯迹肇我藝祖越四壬戌郡所依怙顯允趙公建纛茲土迺新廟貌迺大祠宇迺以旱請應不移武始焉中熟今茲四鬴民舒氣和艾晴稼雨盈尺之雪及歲未暮既雪而霽望無違者民究所自式歌且舞惠

增修甘泉縣志

卷之九

祠祀下

三

濟如公漢則召杜宅生於公古則岐跗惟龍與公如賓斯主侑公之民歆祉羨嘏公爲民請龍弗拒之鑿案刑牲龍則茹之鼓桴之應如寄而取如掇而予如交臂語民體公意莫龍敢侮禱穰謁歛滌樽潔俎歌歛紛若坎坎其鼓颺馭靈旗庶其來下燕我孫子豐我稷黍庸祇事龍彌亘千古

江湖長翁文集

歐陽修賀九龍廟祈雪有應詩眞宰調元化幽靈應不言朝雲九淵闇暮霞六花繁朔吹縈歸旆賓車載後軒睢園有客賦郢曲幾人翻槐座方虛位鋒車伫改轅願移盈尺瑞爲雨徧羣元

居士集

韓忠獻祠在舊城雍熙院內今廢

萬歷江都縣志

郭祥正淮南韓魏公新祠詩新祠重見舊風標儀鳳
無聲立紫霄富貴榮華垂四紀功名事迹冠三朝月
移簾影燈長在春散庭陰木未喬何獨斯民懷惠愛
帝詞天篆刻琨瑤

青山集

純忠廟在舊城雍熙院西祀宋紹定淳祐間淮西北戰
死之士凡四千五百二十六人今廢

萬歷江都縣志

招撫畢公祠開禧間揚民以畢公再遇戰禦有功祠於
夾城

嘉靖維揚志

三十郎廟在揚州西門外今廢

增修甘泉縣志

卷之九

祠祀下

十四

文天祥三十郎廟詩此廟何人三十郎問郎行客忒
琅璫荒階枕籍無人到風露滿堂清夜長

指南錄

續志考正三十郎廟文山詩一絕又復出藝文中

盤古廟在城西三十里盤古山上其像披髮席地而坐
出成都周公禮殿圖也

嘉靖江都縣志

續志考正盤古廟與山川冢墓兩門復出

威烈王廟在城北今廢

萬歷江都縣志

東嶽廟在洗馬橋

續志考正東嶽廟寺觀內又復出東嶽行宮

以上原志

先農壇

社稷壇俱于乾隆二十七年知縣吳瑋詳請運司修理
關聖祠前志載在府東三元坊者每歲春秋及神誕日
本府率同江甘二縣致祭今移祭舊城北門內在三
元坊者江都主之

城隍廟前志析縣後江甘並從府祭在江都地乾隆五
十一年知縣陳太初詳請真人府勅封甘泉縣城隍
仍附府廟之右

文昌宮在南門新橋嘉慶七年奉文春秋二祭俱用太
牢崇祀三代于後殿今府縣俱于此行禮

增修甘泉縣志

卷之九

祠祀下

三五

金龍四大王廟在便益門外黃金壩乾隆五十口年奉
文以春秋祀河神于此 又一在上方寺南運河旁
之北橋每歲鹽艘開橋千百彙集爲通河眾商香火
康熙三年建乾隆三十八年四十一年屢葺

龍王廟在城西七里店乾隆間游擊白雲上知府劉炳
先後祈禱有應屢加修葺嘉慶四年在廣儲門外圓
通菴餘地更建七年添建廊房石橋

邗溝大王廟在城北邗溝之陽嘉慶六年紳商公捐重
建運使曾燠有記

財神廟在舊教場乾隆五十六年運使鹿荃移建司治

北園門外綵衣街

范文正公祠在平山堂右乾隆二年運庫定給春秋二祭銀十一年三十五年五十六年相繼修葺五十九年暴風祠圯嘉慶二年重建

雙忠祠在廣儲門外梅花嶺石坊猶存祀宋揚州制置李庭芝統制姜才乾隆四十二年運使朱孝純修桐城姚鼐記見藝文

曾襄愍祠

在三元巷曾家垣者

嘉慶二年運使曾燠重修有碑

郝公祠在法海寺側乾隆二十九年如臯姜忠基重修運使朱孝純定給春秋祭銀

增修甘泉縣志

卷之九

祠祀下

三

史閣部祠在廣儲門外梅花嶺墓右乾隆十年運使朱續暉詳定祀典鄭大進邊廷掄先後建亭堂置門樓知府謝啟昆有記見藝文四十二年侍郎彭元瑞以所得公畫像及家書進呈

上親題褒慰忠魂四字于卷端

製詩命廷臣賡和並命大學士于敏中書

御製書事一篇及可法復睿親王書于卷後發兩淮鹽政藏弃祠中運使朱孝純展拓祠地募鐫嵌壁四十五年四十九年

聖駕南巡遣祭五十四年運使鹿荃捐置祭器屢加修整

嘉慶七年邑紳士呈請忠義祠設立牌位其籍隸本邑者各依時代先後入祠至隨同史閣部殉節在揚者來自四方載入勝朝殉節錄及府縣志并葛崙所輯本忠義雖同籍貫自分應附閣部祠內今並列名氏於後

賜諡忠烈

援勦團練總兵官右軍都督左都督劉肇基 遼東人

賜諡忠節

揚州府知府任民育 濟甯人 幕客陳美

兵部職方司員外郎何剛 華亭人

增修甘泉縣志 卷之九 祠祀下 七

賜諡烈愍

副總兵乙邦才 青州人 馬應魁 貴池人 莊子固 遼東人

樓挺 汪應龍 汪一作江 李 豫一作豫遇

副旗鼓參將陶國祚

左營參將許謹

右營參將馮國用

前營參將陳光玉

參將李隆 徐純仁

游擊李大忠 孫開宗

都司姚懷龍 許學書

揚州同知曲從直 遼東人

江都知縣周志畏 鄞縣人 閤門殉

賜謚節愍

兩淮都轉鹽運使張振熙 臨海人

江都縣丞王志端 孝豐人

監餉知縣吳道正 餘姚人

副總兵汪思誠 貴池人

揚州同知 一作監軍 王纘爵 鄞縣人

江都知縣羅伏龍 新喻人 一作餘干

欽賜入祠

增修甘泉縣志 卷之九 祠祀下 三

幕府歲進士盧渭 長洲人 生員歸昭 崑山人

續據葛崙輯本設主入祠

兵科給事中施鳳儀 嘉定人

庶吉士吳爾壘 崇德人

督餉僉事黃鉉

通判吳道隆

禮賢館盧經才 胡如珵 歲進士何臨

副旗鼓參將陶匡明

隨征書記顧啟印 陸曉 龔之厚 唐經世

庫官談三傑 子大綱

武職官吳魁 馮士 富以仁 孟容 徐應承

張小山 段元 范倉 張應舉 郭倉

曾登元 范泗 王東樓

都司千總等殉節失名者二百餘人

按樵李詩繫有李白明嘉興人官揚州府學訓導
殉難死又樸村文集有張涵嘉定人標下都司城
破死難應卽在失名者之列李白明失載附識于
此

蕭孝子祠在廣儲門外梅花嶺旁雍正十二年紳商馬
曰瑄重建乾隆四十二年運使朱孝純修桐城姚鼐

增修甘泉縣志 卷之九 祠祀下 无

記見藝文

今案祠于咸豐三年粵匪拆毀同治初年重建

昭忠祠在府西江都地本邗江學舍廢址嘉慶八年郡
中八州縣公捐建立以祀鄉官之殉難者現祀湖南
排補美巡檢丁光國乾隆六十年在任爲苗匪所戕
春秋致祭

羅令祠祀宋江都令羅適在邵伯鎮玉皇閣之旁嘉慶
九年貢生趙洵重修移秦觀所撰碑于廊廡

胡公祠在安定書院之右雍正十年鹽政高斌建飭平
山堂祠奉祀裔孫世守乾隆二十六年增祀高公及

中丞尹公會一以春秋致祭從運庫支領

三賢祠在篠園內乾隆二十年間運使盧見曾崇祀宋歐陽文忠蘇文忠及

國朝王文簡士正春秋致祭四十八年移祀迎春橋之
桃花菴

東嶽廟前志云在洗馬橋今新城所稱新嶽廟是也在舊城者隸江都其一在黃珏橋甚著靈異里人嚴事之康熙初有高忠節公子暄紀事碑其一在邵伯鎮下橋鄉地窪下云水漲至廟門卽止爭傳爲神

萬壽宮在邵伯驛馬頭崇祀許旌陽真君乾隆八年江
增修甘泉縣志

卷之九

祠祀下

三

西宦商修建立碑至十三年工竣爲其公所隨時修葺
葺

以上續志

東嶽廟在洗馬橋賊擾被燬同治十三年僧浩清募建城隍廟在邵伯鎮咸豐三年六年賊再陷郡城意圖北竄見鎮有烟霧蔽空夜復燈火達旦疑有屯兵不敢進犯士民偵知神助稟請奏

勅封號咸豐十年正月奉

旨賜加孚感二字

董子祠

鹽政曾煥重修董子祠記曰揚州有董子祠其碑記始於明正統五年以董子嘗爲江都相又相傳其故宅爲今運使署因而祖榷之

國朝康熙三十五年兩次修建迺今祠所在也其本末皆具前人所爲碑文中厯歲久遠漸就陲剝無以揭虔妥靈於是都人士請於官而鳩工以新之厯三月而訖事請予爲文以落其成謹案董子爲漢醕儒劉向稱其有王佐才今遺書尙存爲治春秋者家法其爲相雖無事蹟可考而以道誼輔王當必有惠澤及民者列在祀典固其宜也又豈以一宅之故爲鹽筴牢盆之所私哉予昔官運使歲時享薦罔不震動恪恭起高山景行之慕越十六年奉

命視鹺此郡而適逢此祠之新瞻仰楹桷肅奉牲醴雖媿不

文其可無言遂爲銘曰漢朝之儒首董賈雒陽少年尙其亞夫惟先生蹈大雅琅琅三策通天人抗心三代醕乎醕相諸侯王豈其屯誰開東閣求賢路斥棄鐘鼎寶康瓠如發蒙耳職是故此郡先生昔常理藹然風流被江汜經訓所滌蔚人士雲車風馬覽九垓披帷肅然先生來千秋萬祀陳玉栢

今案咸豐三年祠燬光緒七年運使洪汝奎重修

三賢祠祀宋歐陽修蘇軾

國朝王士正乾隆間移祀於桃花菴道光十年常鎮通海道李彥章改祀宋韓琦歐陽修蘇軾另祀王士正於菴內載酒堂樓上今圯

今案光緒六年運使歐陽正墉修七年洪汝奎修雙忠祠賊燬全圯同治十三年裔孫世職雲騎尉李新田稟請移於城內三祝菴橋官房改建

曾襄愍公祠郡城祠有二此碑立舊城三元巷曾家垣祠內

曾燠重修曾襄愍公祠碑記曰揚州三元巷舊有公

增修甘泉縣志

卷之九

祠祀下

三

祠歲久傾圯公之裔孫某請余議修余爲上之巡鹽使者捐公資集事落成之日公裔孫乞余爲文以記之感公之事而不得無言也夫國家之安危常繫於一二人之好惡事功之成敗每爭於一二言之主奴無他權勢使然也權在必爭則黨同伐異之見出勢有相角則挾私廢公之事多端啟於大臣而禍流於庶職事壞於一代而論待於千秋幾括甚微關捩非細可勝慨然然以余遐稽往史歷考前賢立功者惟恃乎得君得君則南仲伐獫狁亦賴乎有相有相則充國討先零道濟櫻宋武之疑始不用於索虜岳侯

犯秦檜之忌乃急召於朱仙未有主上銳意以任之
輔臣竭力以贊之而變故猝發戮辱驟加者也公之
請復河套也八議甫上而有壯猷之褒八圖繼陳而
有廓清之諭撫臣會奏不果則切責之本兵覆議稍
遲則諂讓之而首輔夏言方且相倚爲功力主其說
廟謨英武不減漢明之取匈奴政府協同何異馮唐
之舉魏尙將使拂雲祠畔築受降之城勅勒川邊置
屯田之尉公且望玉門而生入渡交河而洗兵復祖
宗百年之士疆息秦晉三邊之烽火不其偉歟何以
君言在耳朝令夕更朝局如棋前反後復司馬但知

畫諾諫官無故罹刑舉朝皆驚中旨莫測異矣哉人
知巖嵩他日之顯攻而不知世宗此時之先人也且
夫開邊生事在昔有之博望初歸李廣利興戎於宛
馬烏孫新輯馮子明矯制於莎車害豈切膚功眞黷
武乃若河套之患外連西海內構大同環衛旣頻有
殺傷延安復屢遭蹂躪豈可置邊氓於皮膜養外寇
於門庭今取公前後奏疏而觀之修築邊牆則周宣
之城朔方也預備芻餉則費誓之峙糗糧也選練士
卒乃仲淹之閱州兵兼備舟車乃王濬之營樓艦而
竟徒揮神筆自壞長城得臣旣誅晉文不憂於仄席

廉頗已死秦襄何憚於窺兵迨延寧之犯方張宣府之攻更急而世宗云報復至此嚴嵩謂起釁有由豈知壁忘鼠鼠不忘壁即使不議恢復能晏然乎況乎言縱莫行罪不至死何以三字之獄不待再聽而刑嗚呼嚴嵩此時徒以夏言故耳疾夏言則必傾襄愍傾襄愍則必阻河套阻河套而俺答入俺答入而明社危誰實爲之而以軍國之謀猷聽諸執政之好惡哉噫詩刺青蠅書嗟黃髮有自來矣

史忠正公祠在廣儲門外賊燬全圮兩江總督曾國藩閱兵道出淮南倡捐建修同治九年落成光緒七年

增修甘泉縣志

卷之九

祠祀下

三

洪汝奎重修

郝忠烈公祠在府城西三里道光十八年知府李璋煜重修今圮

李璋煜記云揚州城西三里許有故明太僕郝公祠焉公諱景春字和滿起家縣教諭歷官至房縣知縣時張獻忠亂於房公守城力盡與一子一僕同被執以不屈死事聞遂贈公太僕勅祀於鄉蓋江都有祠之始也逮至乾隆中

上憫勝國死事諸臣同予諡典公得諡曰忠烈禮也前轉運

使寧夏趙公修其祠宇儀徵相國阮公又繼修之迄

今三十三年余攝是郡而靈廟荒頓遺像就傾椽覆之餘鞠爲茂草瞻拜悲哀慷慨交集迺謀之官斯土者各分俸錢有差立新其廟又以餘財爲其裔孫守祀計江都令羅君煜實主之載在官冊庶可久長而公之賢後輯公守戰之烈爲褒忠錄六卷其書尙存郡人黃觀察承吉王刺史彥和魏明府廷瑜程指揮光治劉孝廉寶楠劉明經文淇楊上舍亮復釀金刊之以行非公英風亮節昭著於人心者烏足以至此哉於戲當明失其柄貪餉媚功之徒養寇自重以至中原傾覆宗社爲墟人心之去固久矣而揚之臣民以義死婦女以節死者幾數百人比之列城不有章於天下耶其時公歿已五載公之女適侍郎張伯鯨子一門死揚難鄉人今猶傷之欲祔主公廟余以禮有婦人外成之義用是議格者所以重公教也

景賢樓在鹽運使公解樓祀明運副楊節愍公乾隆四十八年運使倉聖裔建樓鹽政伊齡阿署名

李兆洛景賢樓記曰揚州鹽運使公解隙地甚曠相傳包漢江都王相董子仲舒故宅而爲之有井曰董子井明初運使何士英亭其井建董子祠於前自後屢有遷移大抵皆在旁近記具州志年久而圯隆慶

初運使徐衍祚潔其井新其祠榜之曰慎德書院碑
尙在井上明之季楊節愍公振熙官運副史忠正公
開闢揚州才之奏擢都轉留其守忠正殉城死節愍
從焉其家口男女十數皆赴董子井以死亂定人無
汲引者爲之羃其上如隴後遂訛爲董子衣冠冢構
屋以祠置神位於冢巔

國朝乾隆四十八年運使倉聖裔以形家言解右地空闕
氣散則財不聚乃建堂又魏樓五楹兩淮鹽政伊齡
阿題其樓曰景賢以適當祠前故也有記勒石堂中
祠故有畫象曰董子象移象於樓而祀之道光二年

增修甘泉縣志

卷之九

祠祀下

三

運使錢寶甫視所畫緋袍而鶴補乃明時衣冠以爲
當是節愍遺象乃旁稽志乘以樓祀節愍而爲之記
勒石題襟館前而董子祠如故道光十七年姚君瑩
以廉慎綜練權運使事謁祠下訝其神位安置非所
因移位於中發其羃而井見寒泉泓然然後知義魄
所在不敢褻視而爲此也因移祠堂稍前空其屋爲
井闌樹碣焉節愍之象持之有據從死之節又昭然
著見則節愍祀於斯樓宜矣而井復爲井去其訛存
其實董子之祠亦復於古夫英靈之氣焄蒿昭明久
而必發而祀典所舉習爽晦昧或疑於其義必有人

焉以其祇肅純懋之誼穆熙端懿之神爲迎而存之
釐而秩之而後鬱者以宣疑者以晰茲祠茲樓茲井
至今日而始昭燭爛朗者固因乎其時抑亦幸遇乎
其人也記之以詔來者

汪氏兩孝子祠在北來寺後祀

旌表孝子汪一崧汪一元

劉文淇記曰古者論秀書升之典始於鄉舉里選故
曰使民興賢出使長之使民興能入使治之然則成
周盛時孝弟睦婣之士皆使之治民無待於表門建
祠也漢代賜孝弟爵而不任以民事其制已漸不若

增修甘泉縣志

卷之九

祠祀下

三

古又寢之而爵亦弗及或表其門閭或賜以束帛其
所以磨世勵俗者豈能及古人之萬一哉然自選舉
之法旣廢祿利之途不出於此而孝子悌弟史不逸
書亦可見孝弟出於性生不盡繫乎有所勸勉況自
明代以來建祠於學令有司春秋祭祀其禮等於瞽
宗之祭焉此其教孝之義抑亦可謂至矣吾友汪農
部喜孫之祖兆初先生諱一元暨其族伯祖伯高先
生諱一崧皆以孝請

旨旌表如例而農部復於北來寺買僧隙地建祠山麓顏曰

江都汪氏兩孝子祠旣與僧立前復呈請有司立案

俾汪氏子孫不得索回香火之資寺僧亦不得毀傷
祠宇寺存與存永永無極或謂農部曰吾子有位於
朝於禮得立家廟且兩孝子既祠於學何又於寺爲農部
瞿然曰禮君子將營宮室宗廟爲先居室爲後唐王
珪不立家廟致爲有司所劾顧予薄宦京師家無一
椽之宅建廟且有待而郡祠啟閉有時子孫不能常
往吾族伯祖又無後予異日卽有力營建家廟而族
伯祖無言祀之所吾先祖亦愀然有所不樂是以別
建斯祠也嗚呼禮之以義起者聖人弗禁若農部所
言亦惡得而禁之也哉祠成於道光十四年農部屬

增修甘泉縣志

卷之九

祠祀下

三

予爲記予因物述古今教孝之典與農部所以建祠
之意以諗後之謁斯祠者

周烈女祠在北門外碧天觀側道光二十八年里人釀
金公建

江之成周烈女詩儀徵周廣發家住白洋山習賈近
市利喬木思高遷卜宅郡城北實爲庚寅年其年生
一女夫婦皆歡欣果然多慧性識字辨烏焉端好寡
言笑書數多所嫻丙午年十七四月清和天阿母問
親串會當十日還父賈住東店晨夕供盤殮有妹僅
六齡食飽惟酣眠獨處心有冲慮患預防閑寢寐不

解衣魂夢不敢安鄉鄰有惡少惡少名桑源稔知父
別居母出未言旋浴佛後一日人靜月已昏奮身挾
利刃踰牆壞其門處心豈欲殺積慮惟求歡詎意貞
烈性不畏強暴人格刃斷四指奪戶思逃奔追刺頸
血濺瀕死完貞堅桑源乘夜逸悲憤奚以宣一旬不
食死追逐飛貞魂女死僅八日捕獲若有神猗歟阮
太傅梓里親相聞詣廬拜烈女風教良所敦行當奉
恩旨潔行勒貞珉冰霜寫心迹遺迹中壘編寄語世間人買
宅貴買鄰

關帝廟在城北方家巷咸豐戊午廟被賊燬里人楊澍
增修甘泉縣志

卷之九

祠祀下

三

捐資復建

社稷壇光緒七年兩淮鹽運使洪汝奎重建

先農壇

同上

歐陽文忠公祠在平山堂光緒五年兩淮鹽運使歐陽
正墉重建

節孝祠在郡城鈔關門內太平馬頭光緒四年在城紳
士公建

武當行宮兩淮鹽運使歐陽正墉倡捐光緒七年運判
徐紹垣募修

文昌祠在公道橋阮氏重建阮克有重修記

耆舊祠在北湖公道橋鎮阮元建阮充有銘記

萬壽宮在邵伯鎮八佛柱南乾隆八年建道光二十七年重建徐太史玉豐有碑記董尙書恂隸書勒石

以上新增

寺觀志

天甯禪寺在新城拱辰門外寶祐志爲報恩光孝禪寺
唐則天證聖元年建名證聖寺世傳柳毅舍宅爲寺寺
有柳長者像僖宗廣明二年改正勝寺宋大中祥符五
年改興教院政和二年從蔡卞請以院爲天甯萬壽寺
紹興十三年詔天下並立報恩光孝寺奉徽宗香火寺
改額焉鄭興裔趙師異賈似道先後修葺之又傳晉時
爲謝安別墅義熙十四年有梵僧佛馱跋陀羅尊者譯
華嚴經於此池中兩青衣童子日出爲尊者灑掃焚香
迨暮候其收經卷而去日復如是時右衛將軍褚叔度
增修甘泉縣志 卷之九 寺觀 一
特往建業請于謝司空琰求太傅別墅建寺號廣陵福
地又華嚴經序云尊者于謝司空寺別造履淨華嚴堂
譯經因改寺爲興嚴寺明洪武十五年開設僧綱司都
綱道葵重建正統天順成化嘉靖間相繼修宋孚禪師
在寺聞鼓角聲悟道作頌云三十年前未遇時一聲畫
角一聲悲如今枕底無閒夢大小梅花一任吹

萬曆江都志

國朝康熙二十三年至四十六年

聖祖六次臨幸

御書蕭閒靜因皓月禪心寄懷蘭竹般若妙源五額禪心澄
水月法鼓聚魚龍及珠林春日永碧澈好風多二聯又

五言詩一幅下長江詩一幅山中晚霽詩一幅五言六韻詩一幅臨米芾書一幅綾字手卷一軸詩扇二柄

賜寺佛像經典有金佛一尊般若心經寶塔金剛尊經寶塔泥金楷書心經石刻心經做顏魯公多寶塔金字心經臨董其昌書金剛尊經藥師經

賜寺書籍有

御製詩淵鑒齋法帖康熙字典

賜寺珍物有供佛萬壽爐一座瑛瑯瓶二枝石硯三水中丞二紫金袈裟一領琥珀念珠一串又

御製幸天甯寺詩一首空濛爲洗竹風過惜殘梅鳥語當堦

增修甘泉縣志

卷之九

寺觀

二

樹雲行動早雷晨鐘接豹尾僧舍踏芳埃更覺清心賞塵襟笑口開五十七年熱河

御製憶天甯寺大竹詩一首久別金焦十一年依稀寒暑遞相遷此君有意虚心待歎我無能白髮聯鴈過西風何處問雲回北地竟誰宣翠筠晚節饒蒼籜遠寄宸章似座前

雍正府志

聖祖仁皇帝天甯寺詩小艇沿流畫槳輕鹿園鐘磬有餘清門

前一帶邗溝水脉脉常含萬古情

御製文集

雍正十一年

世宗憲皇帝命賜紫衣僧明彰出主本寺當

賜御製一物頂一軸 御選語錄二部共四套 心賦一册
紫衣匹襲 碧玻璃鉢一口 拂子一柄 如意一執

十二年

賜法數摘要一本 翻譯要畧一本

賜御書御製詩扇一柄

十三年

賜御製御書聖訓一卷

乾隆四年

上賜欽定梵典金藏通共七千九百五十七卷願寺該住持

僧明彰承

增修甘泉縣志

卷之九

寺觀

三

旨永遠供奉

寺西杏園內枝上村文思房有銀杏二株大數圍高百三十餘尺廣蔭數畝相傳晉謝太傅別墅在此此其園中舊物也雍正間太史徐葆光為之題曰晉樹亭

法雲寺在府城大東門外運司前晉寧康三年謝安領揚州刺史建宅于此後安遷太保太元十年復鎮廣陵移居新城其姑謝氏就于本宅為尼建寺名法雲安所植雙檜宋時尚存

嘉靖江都志

寺後廢為呂吉甫宅建隆元年更建為尼寺有藏經院

釋迦院 寶祐志

續志考正法雲寺爲謝太傅舊宅天甯寺爲別墅
所云謝司空者安之子也今法雲寺在城內運司
治前天甯寺在北門外青龍泉亦在城內自嘉靖
築新城後遂分隔內外

鎮西將軍謝仁祖名尚安從兄也卒于升平初自
升平至太元十年相距幾三十載尙先置宅于此
至寧康三年安領揚州刺史其時仍在建業輦下
遙領而已直至太元十年出鎮安方泣揚並非復
鎮卽以其秋薨是仁祖建宅旣久直以安名德之
重嘗一來鎮遂以法雲故宅兩屬耳

增修甘泉縣志

卷之九

寺觀

四

揚州呂吉甫觀文宅乃晉鎮西將軍謝仁祖宅也在唐
爲法雲寺有雙檜存焉猶當時物也劉禹錫有詩云雙
檜蒼然古貌奇含烟吐霧鬱參差晚依禪舍當金殿初
對將軍映畫旗龍象界中成寶蓋鴛鴦瓦上出高枝長
明燈是前朝焰曾照青青年少時吉甫家居時檜尙依
然建炎兵火樹遂亡

墨莊漫錄

按十國春秋光啟三年冬十一月壬寅楊行
密勒令海陵鎮邊使高霸帥兵民入廣陵有
違命者族之戊戌霸與弟睢及部將余繞山
前常州刺史丁從實至揚州行密郊迎霸睢

約爲兄弟置其將卒于法雲寺已而用袁襲
言閏月巳酉犒軍伏甲擒霸繞山從實殺之
并擒殺其黨于寺死者數千人是日大雪寺
外地數里皆赤觀此則當日基趾恢廓可知
墨莊漫錄固謂爲呂吉甫宅與寶祐志同第
諸志皆謂謝安宅雙檜宋時猶存先哲之遺
蹟誠不可泯歟

續志考正古蹟中又複引墨莊漫錄

旌忠教寺在府治東南相傳爲梁昭明太子文選樓遺
址宋咸淳年間建景泰元年僧惠欽增修

嘉靖維揚志

增修甘泉縣志

卷之九

寺觀

五

陳大建間僧顓公改爲寂照院宋隆興間改功德院

崇祀鄂忠武王岳飛咸淳間賜今名

康熙府志

法華寺在縣東北邵伯鎮羅公祠東卽來鶴寺也隋大
業三年僧普輝建洪武五年僧行山重建正統六年僧
元程重修寶祐志作法華禪院周世宗征淮駐蹕于此
因置院焉開寶中賜額爲寺寺有銅鐘重千斤蘇子瞻
爲之銘今歸併投子寺

萬歷江都志

邵伯埭之東寺僧子惠募千人爲千斤銅鐘蜀人蘇
軾爲之銘曰無量智慧火燒此無明銅戒定以爲模
鑄成無漏鐘以汝平等手執彼慈悲撞聲從無有出

遍滿無邊空

東坡集

按嘉靖維揚志江都志皆謂晉永康間建洪武四年僧普敬重修與萬厯志不同又嘉靖維揚志云邵伯來鶴寺與祐聖觀相鄰寺觀皆有鸛巢二巢有二雛其祐聖之鸛傷于彈二雛待哺于來鶴來鶴之鸛哺猶已子誘之飛鳴全其羽毛人咸異焉時明嘉靖癸巳夏也揚州教授高簡作仁鸛歌以記之

禪智寺在縣北五里本隋煬帝故宮

寶祐志

一名竹西寺隋大業年間建洪武十三年僧道清重

增修甘泉縣志

卷之九

寺觀

六

建

嘉靖維揚志

紹熙郡志云舊傳有東西南北四寺此卽北方寺煬帝幸江都令合東南西北四寺爲一更名上方禪智寺唐劉長卿懷演和上人詩序云寺卽上人所建宋崇寧間參政呂惠卿葬其母楊太夫人于寺之西乞爲功德院後廢又按國朝魏尙書驥上方寺碑記云煬帝常夢夜遊兜率天宮聽彌陀佛說法旣寤遂以離宮施爲寺魏記在洪武間記寺蹟甚詳萬厯四年兩淮運司崔孔昕重修兵部侍郎顧養謙復爲記而魏碑遂廢諸僧斷爲砌石寺山門據蜀岡天氣清朗

南徐諸山蒼然在襟袖間崔復爲木枋障之識者譏焉萬歷江都志

五代楊吳時徐知訓與其主隆演汎舟濁河賞花于此寺舊有石刻吳道子畫寶誌公像李白作讚顏真卿書謂之三絕碑又有蘇軾送李孝博詩石刻埋蔓草間

國朝王士徵爲司李時拂拭之砌于東廊之壁寺側有蜀井前有明月橋雍正縣志

梵覺禪寺在大東門外瓊花觀之南宋淳化間僧智恢建洪武十三年僧雲臻重建永樂十二年僧深信建千

增修甘泉縣志

卷之九

寺觀

七

佛閣景泰三年僧智穎增建

萬歷縣志

舊寺名興教寺

國朝康熙三十八年

御書賜西來法三字額於寺四十二年

賜五言詩一幅金剛經一卷四十四年

賜名梵覺寺

康熙府志

危素揚州正勝寺記有爲浮屠氏學者唐廣明二年建寺于揚州郡城北廂南進賢坊賜額爲興教禪寺五代燬于兵宋建隆二年僧德欽迺重修創大中祥符五年賜改額爲正勝尋復湮廢乾道間天竺教院

僧如祖力學苦行務興其教有董評士諒者捨宅以居之遂爲大隱菴菴在北進賢坊之念佛菴基廣五畝百六十步如祖增加營葺廣其殿堂以安徒眾淳熙十四年請于州移正勝以爲今額如祖示寂楚州淨慧院僧師謙號普明大師以州之命來主是寺始度弟子十有七人善妙善億善倚善德相繼住持景德二年夏寺復燬善德持鉢化金建立殿宇郡人謝都機者施財爲塑佛像作藏室以貯經楊旣歸職方江淮諸路設釋教總攝官未幾命善德主治平禪寺仍俾其徒宗祐領寺事加號崇理昌化大師判教門

專令甲乙相傳勿變久之棟楹梁桷腐黑撓折延祐元年宗祐乃撤而新之益加宏壯其徒了忠裝飾靈山大士諸天像又建法堂四楹東廊十有一楹作方丈以爲燕息之所至了恭作西廊八楹了眞以舊藏殿庫小復謀崇廣于是殿堂門廡庖湑庫庾始獲具完繚以周垣繪以丹碧大修前觀先是如祖乞米飯僧迨咸淳間善德始置土田若干頃以給食又置塔基廣七百餘步于城北以藏遺骨塔南有屋五楹以供祀事了靖所構也厥後宗祐了榮道元了恭了眞了泰先後增土田若干頃時則有若了忠了明道壽

道茂咸有力焉殫力以相其成者通照行進道濟道成道秀云至正十二年道秀領道住事謂創寺訖今幾四百年其廢興之故久而無考證因屬僧行海撰次事狀京師安靜寺住持僧行璽請余爲之記蓋佛之說行乎中國而尊崇護衛莫盛于本朝揚爲南北之要衝宦官顯人往來無虛日富商大賈居積貨財之淵藪其成此固不可以爲甚難然猶經營數十年而後大完以是推之則天下之事豈可易言哉惟能思其成之之艱則不至于壞雖壞必至于復興吾于正勝觀之矣

說學齋集

寺觀

九

增修甘泉縣志

卷之九

按興教寺又名正勝寺詳危素正勝寺記或謂卽天甯寺蓋因寶祐志謂唐僖宗廣明二年改證聖寺爲正勝宋大中祥符改名興教院遂牽合爲一然據危記云唐廣明二年建寺賜額爲興教寺宋大中祥符二年改額爲正勝與寶祐志適相反又萬曆縣志云或謂寺卽興嚴寺以覺賢尊者曾譯經于此蓋訛傳華嚴經序而云然經序謂今天甯寺以宋大中祥符間亦嘗改興教院也按此則興教之非天甯可不辨而自明矣

惠照教寺在縣北三里鄉唐景龍間僧省躬建明洪武四年僧如淵重建正統二年僧福銘修萬曆縣志

國朝康熙十七年僧東雲重修雍正縣志

甘泉山寺在甘泉山一名慧照寺唐開成二年建宋淳

熙四年重修嘉靖縣志

寺西有古井通泉其水甘香大旱不竭

按萬曆縣志石塔寺註云唐開成三年建石

塔葬古佛舍利因改慧照為石塔僧請舊額

更剏于甘泉山亦名甘泉寺是甘泉之為石

塔分建明矣顧于惠照教寺復云即石塔寺

增修甘泉縣志 卷之九

寺觀

十

分建似悞

梵行教寺在縣東北邵伯鎮晉寧康三年僧行密建洪

武初以寺基為水馬驛三年僧妙用遷寺于本鎮惠政

橋西正統十四年僧道暹重修寶祐志作梵行禪院唐

乾寧元年楊行密建名觀音院嘉靖八年賜今額萬曆縣志

雍正志云按寶祐志則寺建于唐何以晉已

有此或以僧與楊同名行密誤傳耶辨正甚

確然如禪智寺據紹熙郡志謂建於煬帝而

全唐詩劉長卿和演和尚詩序云寺即演所

創其說不同蓋一時興廢傳聞異辭或有難

以臆斷者歟

建隆禪寺在縣北一里大儀鄉宋建隆二年詔以行宮
爲建隆寺洪武十年僧行堅重建嘉靖八年僧道秀修

嘉靖
縣志

舊在城西二里西華臺

寶祐志

續志考正寶祐志云二十里非二里也寺以建炎
年廢嘉熙二年更剏于城之壽甯街在天甯寺後
卽今寺非故地也嘉靖縣志失之 前志刻成後
復有增添建隆寺及舍利律院兩條不知係在何
年印本流傳不同

增修甘泉縣志

卷之九

寺觀

十一

太祖征李重進還以御營建寺所御之榻存焉後僧
徒共建一殿申嚴崇奉名彰武殿且請降御容使民
庶瞻仰眞宗皇帝命翰林畫工圖寫嚴衛而往仍賜
供具景德二年八月癸巳命中使前往奉安遇朔望
州郡率官僚朝禮六飛南渡蕩爲煨燼後雖建殿不
復奏請御容姑存遺蹟而已

燕翼貽謀錄

王禹偁郭正俱爲之記靖康元年二月徽宗至揚州
嘗詣寺行香建炎初寺圯嘉熙三年更剏于城之壽
甯街今天甯寺後寶祐間賈似道鎮揚州復新彰武
殿因重葺其寺

萬曆縣志

王禹偁揚州建隆寺碑記唐貞觀中制以天下戰陣處爲寺且命虞世南李百藥岑文本之徒刊勒碑銘紀述功業傳諸簡策燦然可觀蓋聖人不欲無罪而殺一夫無名而荒寸土及乎諸侯阻兵百姓後驅人以戰事不獲已矢石之下死傷則多徇義効忠有足哀者雖復贈官爵祿子孫誠有勸于生懼無益于死以爲漢明之後釋教誕興謂冥漠之中有輪迴之數能使精魄復生人天其道如何事佛誦經而已由是交兵之地捨爲梵宮田不耕而有名也死事之人盡離鬼趣士捐生而無恨也帝王所尚今古攸同雖

有服儒冠而執名教者又安知其果不然耶我太祖皇帝受禪於周啟封在宋朱旗所指黔首乂安惟李重進作帥江都嬰城構逆時建隆元年九月也乃命故中書令石公統王師以討之十有二年傅于城下於是建行宮迎法駕是月十一日太祖至大儀驛距廣陵六十里夜半而城陷詔宣徽北院使李公知軍府事尋以行在立爲梵宮取僧之有德行者處焉是時先寺主道暉本居孝先衆所推擇李公列狀以聞卽可其奏仍改法名爲道堅以紀年爲寺額墾田四頃隸省一莊咸以賜之供香積而飯繼流也道堅旣

沒智速嗣之智速又沒義幽繼之義幽超化大師也
以淳化二年歸寂義隆顯仁監而主焉皆超化大師
之弟子自國初至今凡四十載日供僧不減六十人
像設莊嚴經教具備禮佛有殿演法有堂齋庖在東
僧寢在右奧有室供湯沐焉外有亭給登眺焉廊廡
翼舒門扉洞啟修竹交暎碧流縈回實藩服之勝遊
淮海之福地耳先是太祖將返鑾輿留其御榻忌晨
供帳於今尚存嗚呼戰伐所亡人骨已朽乘茲善果
皆出冥途豈知不再事朝廷復爲臣子歟義隆等謂
修建以來碑誌未立以某出從翰苑守爲郡僚宜爲

增修甘泉縣志

卷之九

寺觀

十三

斯文理不可讓是時大行晏駕聖主承祧至道三年
四月也銘曰神道設教儒所崇佛法度人釋之宗王
者草昧多屯蒙乃有征伐揚武功野必戰死城必攻
出入矢石豈梯衝殞首喪元爭效忠聖人念爾心所
恫詔捨戰地作梵宮遊魂精氣或感通拔爾出離冥
途中恩異文王枯骨葬事殊楚子京觀封香燈鐘磬
飄大風四十餘年僧憧憧止戈偃武文軌同三葉重

光自建隆祐我聖祚垂無窮

小畜集

壽甯寺本徐知誥故第李氏建國以爲孝先寺太平興
國改今名寺甚宏壯畫壁尤妙問老僧云周世宗入揚

州時以爲行宮盡污之惟經藏院畫玄裝取經一壁獨在尤爲絕筆 居士集

建炎二年高宗駐蹕揚州十月享太廟神主于壽甯寺三年正月奉西京會聖宮祖宗御容于寺中 宋史

按宋劉敞行詣壽甯寺詩註云周世宗嘗幸此附錄劉敞行詣揚州壽甯寺詩隋宮老荆棘淮地阻山川天子周王狩諸公楚社遷宿車江水上休甲古城邊清蹕仍過此高臺亦宛然殿空出影響畫古剝丹玄缺螿驚跳鮒遺碑失紀年廢興真可感耆舊每多傳一詠

增修甘泉縣志 卷之九 寺觀 古

蕪城作斜陽聞暮蟬 公是先生傳

龍光寺在北門外顧家巷康熙二十八年

賜龍光寺額又

賜香臺二字額並懸塔院後又

賜唐七言截句詩一幅金剛經寶塔一幅硯一方紅衣一領

雍正府志

竹林寺在北門外康熙四十二年

賜御書五言詩一幅 雍正府志

大明寺在縣西北五里卽古之棲靈寺也又曰西寺以其在隋宮西故名寺枕蜀岡 寶祐志

國朝康熙四十四年

御書澄曠二大字額五十八年

賜內織綾幡懸掛於寺 雍正府志

羅玘重修大明寺碑記距揚郡城西下五七里許有寺曰大明蓋自南北朝宋孝武時所建也孝武紀年以大明而此寺適剏於其時故名宋主奢欲無度土木被錦繡故剏建極華美垂至于唐陸羽于此烹茶味其寺之泉水爲天下第五品載在茶經可考及閱都官員外郎梅聖俞堯臣文集內賦有曰蕪城之北大明寺闢堂高爽趣廣而意麗又詩之辭曰此景大

增修甘泉縣志

卷之九

寺觀

五

梁無則其舊規之觀美可窺矣然歷世旣久遂爲瓦礫牛羊墟過者興慨景泰間有僧智滄溟者本鎮之武弁裔少慕禪宗投禮沖徹堂禪師出家爲佛弟子天順間北遊五臺回抵於揚偶適野見摘星樓西平山堂東中有空隙地約廣數十畝厥土燥剛厥位面陽厥地孔良放生池環于左清平橋橫於前若遺趾也啟請郡守三原王公宗貫衛使李公鎧徐公清輦乃結小菴以棲于上不踰月夜夢一神人指示之曰某有井井有歲循其處而發之果得古井內有殘碑一方上有大明禪寺數字人自是始知爲古刹其出

于神授如此四方博雅嗜義之人悉捐金資爲法堂
五間東西廡各數間庖湏庫庾以次粗備越宏治癸
丑關陝諸虀客始建大雄殿設立金像規模甚宏偉
而智滄溟尋示寂矣厥徒鎮大方嗣其緒至乙丑歲
復建天王殿五間而大方亦故令孫廣勝主焚修焉
于正德丁卯建伽藍祖師一殿蓋自是始稱備矣夫
勝地古蹟湮沒幾數百年而恢復于祖孫相繩之三
世厥功懋矣然非輕財者樂爲之助其能告落成也
哉固宜礪石紀名以垂永久此主僧所以爲請也矧
大明之名肇于先朝若不以爲重也今皇祖啟運國

增修甘泉縣志

卷之九

寺觀

六

號適同甘泉一脉豁然流通豈非天意有在以翼我
國祚億萬年無疆之祿也耶揚志成于它郡人之手
此寺在所弗載誠爲缺典使非照證于先賢之遺跡
則亦無所據也今以久湮之廢緒爲巋然之達觀與
摘星之樓平山之堂并峙蜀岡之顛以爲揚望誠未
宜泯也予起復過揚時嘗與江都丞曾英予門人葉
如欒輩登眺飲泉于其間于時尚草草也今越二十
年矣而此寺規寢備予憶舊遊臨文不覺憮然圭峯文集
葉觀重修大明寺記廣陵爲江淮之都會故多勝跡
值宋元兵火之餘其存者僅十之二三耳考之南北

朝有寺爲大明宋湮沒久矣天順間僧名智滄溟者於郡城西五里平山之原而得其遺址焉遂出囊資延檀越而重建之殿宇崔嵬門廊秀拔泗水通流江峯迭翠誠勝境也歲久荒頽其徒干謁而無緣光祿署丞火君文津一旦慨然曰余承先人之業資其所廢以增山川之盛不亦可乎遂捐千金葺之闢山門之隘者三易棟宇之腐者百廣殿之前簷以軒凡五楹焉左右建鐘鼓樓二東西立二座所以豁登眺洞出入也見其山曠衍平伏謂歐陽文忠公所建平山堂在其右而久傾遂扃其前庭曰平山堂飾之青綠

施之文采所以昭先賢之佳況也門之外有井爲郡之五泉乃浚之立亭其上復建廊房十四楹於方丈之右以爲僧之棲止視滄溟所創規模宏麗矣督工者戶侯張西樓璽也僧感其德走竹西草堂求荒文以紀之觀有感而言也美哉火君之舉余昔登其山而遊覽焉水光東注山色南浸雲霞遠疊綠野平臨鑑樓左峙鄉祠右迴邗江透前盱山擁後鶯花明媚林木鬱葱白月皈地瑞雪鋪瓊憑高眺遠四時可娛之法界也今復葺而新之其郡之麗景何加焉余嘗謂其先人樂山公之種德崇儉善于積財而文津之

好義喜施善于用財此克家之慶也噫非樂山之善積無以成文津之美非文津之善用無以顯樂山之名易曰考无咎文津以之因紀其概以爲後之尙義者勸

省菴集

趙有成重修棲靈寺並建地藏殿諸天樓碑記廣陵稱江淮都會負其勝而名著天下者得平山之棲靈寺寺址去縣治五里許渡紅橋北折而西踞蜀岡之巔江峯羅列於前淮水環遶於後東則有功德山迷樓屹於左西則有先達祠宇司徒殿閣映於右五泉甘冽三山縹緲實爲一郡巨觀而遠黛浮嵐塔峯沙

增修甘泉縣志

卷之九

寺觀

六

鳥以迄兩城廛市萬戶烟井一盱衡間瞭如指掌古今都人士之憑弔者皆於茲山稱最按大觀圖經寺塔建隋文帝仁壽元年詔海內立九層塔三十所此其一也後以燬景德元年僧可政募民財復建七級塔名曰多寶聞於朝爲泗州大聖示現火之後修於明天順年禪師滄溟復闢於萬曆年大守吳公其寺之稱名創建始末有歐陽公大明水記陸羽茶經謫仙工部香山東坡以及歷代名卿碩彥之詩賦王郡守化基之塔記羅學士玘葉中憲觀趙司李拱極之碑記並郡邑志之紀載詳矣迨經兵燹僧徒星散以

致山虛梵冷谷靜鐘寒風流旣邈名勝寢湮而香臺
藻井竟變爲燐火烽烟其畫棟層檐盡摧於樵夫牧
豎並不聞遊人響屐時惟見將軍牧馬而已歲甲午
余與星垣弟讀書寺之前山法海僧舍時同憑弔欲
更新之而未逮也丁酉春召主僧佛生佛靄謀集郡
諸縉紳耆老請於郡守傅公哲詳出書公延受宗旨
和尚乃曹洞三十世之正傳立十方叢林爲此山開
創祖庭之始焉寺西隅數楹余額其楣曰獅子窟爲
受和尚函丈地自是闢寺址墾草萊修其頽敗葺其
傾圮陞堂說法四方星拱雲集初立禪規而茲寺之

草創成矣未三載受公示寂何尺竿始進忽隻履西
歸豈惟十方檀越惆悵良因直使八部天龍徘徊善
果賴法嗣道宏南和尚受先人遺乘其願力篤志繼
述請先達曼仙陳公爲之疏募願旣堅道力益固士
民向風施財資助者甚眾殿宇廊廡輪奐一新像設
莊嚴種種美備及地藏殿成而山門復舊由是祖祀
有堂安禪有室延賓有寮種蔬有園飯僧有田貯供
有庫開接眾道場以待來緇素而晨昏之鐘鼓備焉
六時之課誦嚴焉雲水之徒從而棲止者日常百指
寺之規制得道公漸整矣道公旣爲曹洞祖庭開闢

之肇始嗣其席者則有麗杲昱和尚復乘願力募建諸天樓樓成丐予一言爲之記嗟乎山寺今復得還舊觀雖山川地脉風會使然安在非法席三公之願力感召於天人者有不可誣也哉予自都門謁選歸里爲之記其事詳其始末勒石寺陰俾後之住茲山者不得紊亂法規更令後之繼茲席者無忘所自而顧名思義共報君師之恩以達前人之志爲法門柱石焉至受公道行自有語錄及笈侍御之法源序家太守伯兄之塔銘在方今聖人御宇佛日再中卽寺之成以爲教化養贍之藉不獨山靈增重抑或扶持

世道人心之一助歟是爲記

舊志

附棲靈寺塔大觀圖經云隋文帝仁壽元年以誕辰詔海內清淨處立塔三十所此其一也于是久旱舍利入塔夜雨大淹後以燬廢景德元年有浮屠可政募民財於寺中復造七級塔曰多寶塔三年郡守王公化基撰記四年以其事聞於朝賜名晉惠建晉惠塔院崇寧間塔有泗州大聖示現始衣紫轉相輪上少頃衣變青復行數匝隱身入相輪遠近士眾見者瞻禮新安江致評嘗爲讚偈又舊志云當塔燬時或見空中祥雲擁一塔而去又有國使自高麗回見一僧手擎一塔問之云揚

州棲靈寺塔也

萬歷江都志

按釋氏通典引宏明集云隋文帝龍潛有梵僧授舍利一顆曰他日爲普天慈父此大覺遺靈留與供養帝作七寶箱貯之仁壽元年下詔請大沙門三十人各將侍者二人散官一人熏陸香百二十斤分道送舍利往雍岐秦華嵩衡等三十州建塔帝曰佛法重興必有感應後處處表奏皆有瑞徵據此則棲靈之名當本於梵僧大覺遺靈之言其大觀圖經所謂夜雨大滄者卽揚州之瑞徵也塔建

增修甘泉縣志

卷之九

寺觀

三

於隋仁壽燬於唐會昌再建於宋景德據周益公泛舟遊山錄云大明寺塔南宋尙存而嘉靖府縣兩志惟云天順間復建萬歷志又云宋以後興廢不常至明僅存基址萬歷間知府烏程吳公平山重新崇禎十一年鹽漕楊公重造觀音大殿五間左右兩廂屋各三間正殿一座天王殿一座鐘鼓樓二座寺門外又建輔揚樓僧舍等云云其于塔毀廢之時蓋已不可考矣

國朝雍正間光祿寺少卿汪應庚捐資修建增造雲蓋

堂洛春堂萬松亭山亭水池于寺前後種松
十萬株寺復成巨觀其築雲蓋堂時掘地數
尺得古磚堅厚者若干當日塔基宛然可按
咸謂一時勝舉云

遠公寺在吳公臺側見名勝志 雍正縣志

投子教寺在縣北宜陵鎮宋開寶年僧夢菴建洪武三
年僧真全重修景泰四年僧景文重修投子禪師有語
錄傳世 萬曆縣志

按天甯興教壽安石塔旌忠清涼梵行投子
八寺俱稱廣陵叢林諸寺所歸併者也見高

增修甘泉縣志 卷之九 寺觀

三

宗本維揚新志

續志考正投子教寺在宜陵鎮隸江都

釋迦教寺在縣東北邵伯鎮卽寶公寺宋元祐五年僧
惠朗建景泰三年僧文演重建歸併梵行寺 萬曆縣志

圓通寺在縣東北二里官河西岸卽北來寺宋乾道間
僧道紀重建景泰三年災四年僧曇謐重建成化十一
年僧惠體拓地改修 萬曆縣志

北興教寺在縣西北廢堡城內宋寶祐間建明洪武三
年僧智宣重建正統十二年僧景宏重修歸併旌忠寺
唐景雲三年杜佑爲揚州處置使題名八角石柱留寺

內後沒於水池中成化十六年旱池涸復出好事者多
摩搨以傳

萬曆縣志

壽安教寺一在府治東南舊馬監巷宋景定間建元至
正七年僧德甯重建明正統六年僧淨廣重修一在縣
西北三里大儀鄉宋紹興間建明洪武十三年僧道智
重建正統十年僧智登修

嘉靖縣志

按萬曆志作北壽安寺云鐵佛上方及北壽
安三寺俱歸併石塔寺

蓮性禪寺舊名法海禪寺在縣西北三里善應鄉不知
創自何時

增修甘泉縣志

卷之九

寺觀

三

國朝康熙四十四年

聖祖南巡幸此

賜額蓮性寺

按府縣志俱云元至元間僧正爲建明洪武
十三年僧曇勇修正統元年僧福宏修而本
寺現存經幢石刻題天祐三年法海僧惠恩
建立明嘉靖四年碑載廢井中得甃石有庚
戌開皇十年僧志德肇記十一字則寺創自
隋唐而元時重修也

國朝順治壬辰郡人趙有成在寺門外建轉輪殿

魏禧重建法海寺記揚州平山未至一里許有法海寺府志載寺創于元至元明初重建之增修于正統寺址水周四面形如蓮花後有土埂脉自三山迤邐而來穿水以接于址若莖然游平山者舟必過寺橋春秋之日畫舫簫鼓無虛時盛夏蓮開士女遊眺瞻禮不絕鼎革後寺日圯僧撤梁木椽瓦露佛以募于眾數年不就諸佛久雨立遊人趨而過之心怛然莫爲之所者歎人程君有容善士也夜夢入大屋前後門閉不得出甚惶懼顧見諸神顛仆敗塲中泥落藁見後有狹室疊臥神像無數頭足形不具節解支分

程君旁顧無一人慘怖益甚遽叩頭祝曰願我得出必修此已出門見河水遂寤他日與閔君世璋述之閔君曰出門見河其法海寺乎是寺廢有年神其以煩君也程君過法海則一一如夢所見乙卯春君乃謀於祥光和尚自出四百金倡建閔君先後亦四百金大殿旣起會得五臺僧洪舟所募五大士像復建高閣殿後奉之而吳君自亮出金二百五十席君上珍二百金身董役作吏科給事李公宗孔暨黃君朝美等並宣力襄事凡幾月而告成殿高幾丈幾尺廣幾丈深幾楹佛諸天羅漢像皆塗以赤金丹腹其座

閣高逾殿廣稱之於是遊平山者必登法海皆誦程君功德往吾與親知論建造寺觀之說儒者闢二氏不可通於眾人然創新者之不如修舊也甚矣二教之說不同其欲利人濟物則聖賢仙佛無不同者故布施者崇大觀寺多雕塑仙佛不若以施窮苦無告之人賑饑救溺諸急難蓋仙佛之宮遍天下不必更增一宮像徧天下不必更多一像夫移廟像之財以利濟人物此固仙佛之至心雖然因其舊所有修其圯壞而新之則有說神明之人生而好修當世所謂賢者也或助王化所不及或功德加於民前之人既

像而宮之矣至於傾圯糜爛如程君夜之所夢日之所見雖聞者不勝其惻怛夫聽訟之樹弗忍翦伐壟土之草木禁樵採而况親貌其像庇其貌之宮乎程君數感異夢一見於天妃一見於法海夫天妃無宮故不嫌特建法海因舊所有是皆能敬鬼神而無妨于民義者予故因其請不辭而爲之記

魏叔子文集

錢志進重修法海寺復建塔院置田始末紀事郡治西郊渡虹橋迤邐北折而西越里許有寺巍然高峙菁蔥環映揭其楣曰法海元至元年間古蹟也重修於正統監察御史廬陵彭公寺基高突而環水中形

家謂之陸地蓮花脉來自蜀岡而爲三山屏障寺後一隄蜿蜒迳水而達於寺若蓮之有莖因名蓮花隄明季楊璫督漕兩淮築保揚城廢隄爲橋障寺之西河築堡於寺址隄斷脉傷而寺之殿宇日漸圯廢順治壬辰春郡人趙子柳江與弟岷江讀書山寺毅然請諸當事開西河之障毀橋成隄獨力修復蓮花古蹟培寺脉而增崇之然寺之殿宇傾圯如故也至康熙丁巳秋有閔君象南程君休如雷君含輝王君芻夫輩倡捐修葺建大樓五楹供大士像黝堊丹牖寺乃粲然復興四時簫鼓士女遊觀月無虛日畫船燈火繞寺前後而寺內晨昏鐘鼓二時課誦盛倍于昔甲子冬

增修甘泉縣志

卷之九

寺觀

三

翠華南巡兩幸其寺余自山左解綬歸里復睹其盛歎地脉

效靈形家之言不爽也趙子慘見兵燹後四郊枯骨暴露稟父荆石公乃建歛骨塔院于寺東隅名曰轉輪藏以瘞遺骸置田八畝四畝永供寺殿香燈四畝分給塔院拾骨單資田界濱河繞寺左右載入郡志誠盛舉也趙子名有成字子淑柳江其號也乙丑歲進士潛修山寺雅著時望自名上天官後杜門著書闡譯性學一堂四世登髦齒而舉賓於鄉非積德積

學之報乎主僧眞住丐余紀其始末勒于石俾後之來遊者覽余言考蹟論世相繼修葺以永古蹟於不朽是以樂爲之記其事

法海三義閣在蓮性寺左有明時山右諸商士公建

國朝乾隆七年平陽賀綸音重修鼎新其廟宇供神贍僧有常費又繕平樓植花石以爲游人憇息之所聯惜字會每月集好義者舉行閣本踞勝地今益增法曜焉郡守三韓高公士鑰爲之記

記曰揚州名勝之地曰平山曰法海而法海去城尤近登平山者於此得半途湖波環碧隄柳依依遊人

增修甘泉縣志

卷之九

寺觀

三

每樂以騁懷而憇足焉橋西有三義閣祀漢昭烈帝壯繆侯桓侯而名則以關聖廟著廟建自山右諸商士由有明歷今逾百年過者仰之然以歲月之久則亦漸卽於敝乾隆辛酉秋平陽賀君綸音來揚州慨然念鄉人之功德斯寓也鼓願力以爲眾倡暨茨其垣墉丹牖其棟宇莊嚴其法像蓋奕奕乎成新廟之觀矣更爲葺平樓列几榻疊石於堦羅佳樹以掩映其庭戶修饗祀者旣得肅容齊志於其間而春秋佳日郊遊者亦得以恣其偃息憑眺之娛是不益景色而稱勝境矣乎其飯僧有常餼香燈有常供月舉惜

字會以要諸久遠冀茲廟之無貽荒廢也賀君之經營不旣備歟余忝守是邦間嘗褰帷郭外見茲廟之敞於昔者特煥然其一新於今而登樓屬目則亦足以與覘民風因爲樂其工之竣而攄筆記之賀君傑士所以振興其鄉人之遺蹟者屢矣城南天寶觀厥功偉焉城東關帝廟三絕碑之所艷傳也亦其鼓舞而作新之今復單心於此可不謂孳孳爲義者哉乃賀君曾不自多謂同志之有若而人在也爰並書其姓氏以著於左

乾隆七年冬綸音更擴閣右地建文昌殿呂祖樓並

增修甘泉縣志

卷之九

寺觀

三

構軒亭廊榭疊石種樹其間儼然成園林之盛郊游者耳目爲之一新郡守高公復紀其事以繼前記之後

記曰法海橋三義閣之敞也賀君綸音葺而新之余有記焉旣復告余曰閣據勝地而址故隘殿祀漢之一帝兩侯以文昌側隅座此於神有未安者平樓一斗室耳每春秋佳日遊人踵錯登眺者幾不能容此亦於人意有未愜也吾將更有事乎此余曰善無何君出已橐購閣右呂祖堂廢址以益之又爲擴其西偏至蓮性寺界而止得地凡百丈有奇廣且大矣於

是立規模籌經費鼓願力於其鄉人之近處邇上者
三晉固素多樂功趨事之士如劉君正其楊君希文
亢君翼舒劉君梅村王君輝裔宋君廷珍朱君文安
宋君有孚舉欣欣然從之恐後而君則獨任其成以
務極乎烟雨樓臺之勝建文昌殿三楹正明神之位
祀也呂祖樓三楹崇上真之遺跡也廊二十楹遊人
之所可倦休而憇足也廳事三楹賓客之所可流連
而觴詠也爲亭者二一以挹清波一以攬落照也僧
寮廚舍各三楹禪榻所容安飯鐘所朝夕也後築土
山構北軒其背披近湖之荷風聆遙山之松籟也經

始於壬戌冬十有一月迄癸亥夏四月而後告終事
焉良材堅甃屹然成不拔之基而黝堊鮮彩竹石掩
映疏櫺高敞四時之卉紛羅於苔堦蘚徑之間美哉
蓋誠足以妥神祀而快遊觀矣夫天下之稱勝蹟者
名山大川而外未嘗不與有人力也唯有人焉經營
而潤色之則一時之藻繪卽以新耳目而侈流傳後
世且爲之憑弔興衰低徊而不已今賀君此舉爲
郊原增景色者莫大異日而標諸圖經誰謂其不與
蜀岡平堂同恣歎賞哉邦人士相率而日往遊焉夫
固樂之而若不忍舍以去矣樂民之樂者太守事也

因復繼前記而文之於石凡諸君子之所以展力於茲者並爲紀其實以使後人之有所考云

西方禪寺在西門四望亭北唐永貞間僧智完建明洪武五年僧普德重建永樂十四年僧宗鐔修正統三年都綱自性重修

續志考正屬江都

大雲寺神僧傳云唐鑒貞禪師出家於此寺在揚州

觀音山寺在縣西北大儀鄉元至元間僧申律建明洪武二十年僧惠整重建題之曰功德山爲蜀岡三山之一勢尤聳特高宗本維揚志云卽古摘星亭址俗傳爲

增修甘泉縣志

卷之九

寺觀

三

隋迷樓故址者譌也寶祐志作摘星寺今皆呼爲觀音閣每二六九三月膜拜者踵接於道夜猶燈香相望謂山之太士靈爽最著

寺
國朝乾隆六年郡人汪少卿應庚以萬金鼎新其山及

按太平清話摘星寺迷樓故址也其地最高金陵海陵諸山厯厯皆在履下云云據此是宋時已有摘星寺且亦其傳爲迷樓故址矣

鐵佛寺在縣東北七里大儀鄉唐光化年間建內有六面碑刻

嘉靖維揚志

舊在堡城東史老門本楊行密故宅光孝間以其宅爲院名光孝院後傳僧伽嘗現於此釋徒所謂顯化第二處也宋建隆間鑄佛因名天聖間復爲光化寺崇寧間改崇甯寺政和二年改天甯萬壽寺三年爲興教院僧請光化額揭於山光寺之西方院久之又改西方院爲興教而是寺復今額舊有寶塔不存端平中寺廢淳熙九年僧卽威烈王廟東重建寶祐志洪武十五年僧得信修宣德九年僧懷極重修殿後有雙檜尙是宋元間物上竦無枝取其皮焚之香如

沉速

萬曆縣志

增修甘泉縣志

卷之九

寺觀

三

普慈寺在新城洗馬橋西舊燬於火明隆慶間重建

同上

萬壽寺在宜陵鎮東三十里

雍正縣志

宏恩寺在城西二十里

同上

水月觀音寺在北門外見明烏斯道記

烏斯道重建水月觀音寺記揚之水月寺者僧碧潭禪師所重建也寺舊在北門之夾城今城減縮去城可一里民舍鮮少境益清曠左瞰河右挾甘泉山其背積土石爲高邱樹以松栢亦殊勝地某禪師創於端平間而甲乙其傳元至正末兵四起揚失守城陷寺燬鞠爲荆楚瓦礫之墟者幾三十年禪師先避亂

居姑蘇欽遇聖天子戡定海宇因復歸揚出橐金創
菴於郡城東旣成將以舊所燬寺名榜焉念曰觀音
大士以十四種無畏力變現于塵刹光明猶水月也
月凡值水必形實一月耳茲加舊名固無不可然北
門舊址尙存不重構如滅吾祖始建之意何庵遂更
立名別召僧主之復從舊址斬荆楚輦瓦礫購材鳩
工作大殿門廡方丈法堂習靜會食之所齋厨溷瀉
咸具一如舊制莊嚴以間計者三十有奇繚以垣墉
飾以丹雘崇以佛像鐘鼓香燈亘夜弗匱工始於洪
武十六年癸亥月日僦於洪武十七年甲子月日師

謂是役也苟不記其顛末何以示久遠乃介友人王
子建氏請文於余余惟聖天子以先王之道教化萬
民學校以先王之道贊天子教化民罔不惟禮法是
從然有軼禮法而縱焉者或化于佛氏免戾于罰是
佛亦贊天子之教化者也則寺刹之建其可已乎且
揚古廣陵地爲南北要衝天下重鎮今畿甸之股肱
郡也其人物之盛必有化於物者不在樹法幢振法
鼓必於虎狼所窟宅人跡所不到之地也哉禪師殫
力竭智圖興起於旣絕以復舊規以亢厥宗可謂難
矣嗚呼自元末來寺廢於兵火者何限求其興復如

禪師者殆寡若禪師者非勇於負荷法任而有功於後先者歟禪師名行深實某禪師十九代孫俗氏李氏揚人也自薤落卽習禪定處已澹泊其興造之費則皆爲人演法諷誦歲所得施資蓋積而有所待也今爲中葉開山祖云子建名植性好德樂善亦揚之世守詩禮者

春草齋集

蕃釐觀卽古之后土祠瓊花產焉在府城大東門外漢

成帝元延二年建

嘉靖府志

蕃釐觀在舊城東南隅五代以前在城外名之后土廟俗所云瓊花觀也唐中和二年呂用之妖人說高

增修甘泉縣志

卷之九

寺觀

三

駢崇大其廟極江南工材之選一名唐昌觀後廢正

統間重建

方輿紀要

宋正和間賜今額舊有瓊花一枝相傳天下無雙宋歐陽修守揚州作無雙亭侈其事今名瓊花觀後有井道家者流謂下有玉鈎洞天因名玉鈎井其說荒唐不足據也元年道士吉性淵重建永樂十二年都紀李元正重修宣德間知府韓宏增修吏部尙書魏驥有記萬曆四年運使崔孔昕重修萬曆二十年知府吳秀勅玉皇閣于三清殿後舊后土祠遺址也

萬曆

縣志

按玉皇閣于乾隆四年燬于火

唐中和二年高駢本漢書所謂后土富媪肖女像又因小說有韋郎事塑綠衣年少于旁至宋程頤以其褻始撤之

雍正縣志

后土祠瓊花辨齊東野語云瓊花惟揚州后土祠有之絕類聚八仙花色微黃而香甚宋慶厯間嘗移植禁苑淳熙中壽皇又移之南內皆逾年而枯送還揚州敷榮如故俗傳聚八仙花可接特香色俱減豈非以聚八仙類瓊花遂疑爲接本耶杜旂瓊花記紹興辛丑金主亮揭本而去小者剪而除之花頓萎悴趙

增修甘泉縣志

卷之九

寺觀

三

炎以詩弔之曰名擅無雙氣色雄忍將一死報東風他年我若修花史合傳瓊妃烈女中未幾故株之旁復出三蘂道士金大甯日加培護久之暢茂婆娑不異昔時及元至元十三年忽枯其種遂絕道士金丙以聚八仙花代之鄭思肖有弔瓊花詩自序云揚州瓊花天下惟一本后土夫人司之花之盛衰淮境豐歉應焉南渡前經兵火此花死今遭大故丙子歲維揚陷丁丑歲花又死孰謂草木無知乎詩有一朝楛枿變高樹傳得歌聲沸似雷之句據此則瓊花植於漢唐兩榮於宋一揭於金再枯於元此則花之始末

也明初志及高宗本新志皆謂蕃釐觀一名唐昌瓊花一名玉蘂蓋承譌前人未及精考耳宋次道春明退朝錄云揚州后土祠有瓊花一株卽李衛公所謂玉蘂花也宋景文筆記曰維揚后土祠有花名玉蘂王禹偁愛賞之稱之曰瓊花蔡寬夫詩話云李衛公玉蘂花詩爲潤州招隱作也或云卽揚州后土祠瓊花尤延之全唐詩話又謂揚州有唐昌觀是以蕃釐爲唐昌也蓋唐詩紀事之誤傳譌非一日亦非一人矣劉原父蘇子瞻諸人亦皆以玉蘂爲瓊花惟葛常之韻語陽秋辨之極詳可破從前諸妄按唐昌觀在

長安光業坊明皇女唐昌公主下降因以爲名花爲公主手植康駢劇談錄云唐昌觀有玉蘂花每發若璫枝瑤樹元和中春物方盛車馬尋玩一日有女子年可十七八衣綠繡衣垂雙鬟髻無簪珥之飾容色婉婉迴出於眾從以二女冠三小僕僕皆卵髻黃衫端麗無比旣下馬以白角扇障面直造花所異香紛郁于十步之外觀者疑出宮掖莫敢逼視伫立良久命小僕取花數枝而出將乘馬謂黃冠曰昔有玉峰之期自此可以行矣時觀者如堵但覺烟飛鶴唳景物輝煥舉轡百餘步有輕風擁塵隨之而去須臾塵

滅望之已在半天方悟神仙來遊時王建白居易張籍嚴休諸人各有詩此唐昌玉藥花所由名與揚州蕃釐觀瓊花何與宋无感瓊花詩云應須有玉女到此玩瓊葩玩詩中玉女故事蓋誤引唐昌觀玉藥花事也明楊慎堦戶錄唐昌觀王張諸詩有玉女雲車飛輪回首之句謂爲附會天下無種之說則亦以玉藥爲瓊花矣蘭谿吳應麟說蔡云玉藥自植于唐昌瓊花獨產于后土廣陵長安道里懸絕瓊花無別本而玉藥托根非一玉藥旣卽瓊花諸題玉藥者不應絕口不及瓊花之名應麟斯辨自不可少也

康熙府志

按瞿佐吟堂詩話云廣陵志后土祠瓊花自唐所植天下無雙紹興辛巳之變金人揭其本而去老道士言虜退傍有一小根剔其皮投火香達于鼻培護之明年二月夜大雷雨詰朝三藥生其說本杜旂瓊花記第謂自唐所植究無可攷府志且謂植于漢唐殆因祠建於延元耳考王闢之滬水燕談云揚州后土祠有花一枝潔白可愛歲久木大而花繁俗目爲瓊花不知是何木瓊花舊本無種故代醉編云傳紀所載揚州瓊花天下只一本

宋韓魏公詩維揚一枝花四海無同類鮮于
侁詩百卉天下多瓊花天上希此皆花之實
錄也又宋張問瓊花賦序云揚州后土祠瓊
花經兵火枯而復生今歲尤甚郡人喜之以
爲和平之瑞元郝經瓊花賦序云中統二年
春三月制使李公致瓊花數枝是年冬十月
夢二客相邀至維揚之后土祠飲於花下嘯
歌爲樂觀此則花之靈異又不獨瓊妃烈女
之日矣若西湖里語謂宋時德清嶽祠廡下
有瓊花一本春時盛放每告朔設會特開數
朶號月旦花豈慶厯淳熙兩遷禁苑俱命載
還獨能敷榮於此與是卽玉蘂聚八仙之類
或誤目爲瓊花未可知也

國朝乾隆丁巳歲觀內新建文昌祠郡守三韓高公士
鑰爲之記國子監學博金壇蔣衡書

記曰揚州治濱大江爲南北綰轂兼以鹽筴期會穰
穰往來而談經講藝之士亦日以眾惟我

朝文治光昌涵濡沐浴享聲名文物之盛已非一日矣余

自奉

特簡來守茲土六稔于茲其間豐歉有不時登耗有不一仰

賴我

皇上休養酌劑屢沛蠲除民氣用以和樂余亦得免隕越以奉揚

聖天子之休命特是修三事敦五紀各業其業以安日用飲食之常者人也俾年歲順成民無天札消弭不祥以納民于禔福者神也故欲求民瘼之當加意力行者也廣陵蕃釐觀前後殿庭廊廡奉諸天列宿各有名號其西廡之末三楹爲文昌祠人皆病其不稱適殿右舊有西雷壇一區爲本房道士鬻諸民間今方丈住持道士張清倫與其徒高一元全真奉戒節縮衣

增修甘泉縣志

卷之九

寺觀

三

糧得二百四十金贖歸方丈欲移君像位於其地具始末來告余曰此邦正祀赫聲濯靈宜專祠宜南面撤舊更新固其所耳於是一元預購材木陶瓦甍將事卜築邦之人爭先樂助主政馬君曰瑄總其綱主政吳君山玉復補其闕畧立殿三楹奉帝君前亭三楹門五楹已訖工矣道士又以形家配合五行之說復更祠門爲重屋方其經始金壇蔣博士振生僑寓於觀寫十三經請余剏惜字紙會幸道士頗能實力奉行街巷間無廢紙狼籍及文殿上樑之頃在律中黃鐘冰雪嚴凝之候桂香漠漠聞觀內外經卯辰二

時不散於是蔣君以桂香二字顏其亭楚辭曰桂樹
叢生兮山之幽而道家謂帝君所主之籍曰桂籍凡
士庶之多行善事者則登桂籍掇青紫擢琳瑯俾熾
而昌俾壽而康新宮始作而兆斯祥亦大異矣是役
也始於惜字繼以興文翌國家之昌運啟風俗於大
溘蓋所關者甚鉅而豈小補之云哉工始於乾隆丁
巳十有一月訖於庚申之春凡有助於斯宇者例勒
姓氏於貞珉是爲記

元妙觀在城東北僅存遺址

萬曆縣志

陳鉅夫揚州重建元妙觀碑記至元中詔賜天下天

增修甘泉縣志

卷之九

寺觀

五

慶觀額曰元妙凡省臣守臣軍府外署在其治者歲
時朔望咸集而祝釐焉他觀莫得與比故天下元妙
觀宏壯麗飾罔敢怠荒惟揚州歲久弗治蒼萎圯委
狐伏鼠竄列像勿蔽贊拜無所風雨驟至折撓相枕
藉大宗師見之曰是吾責也選道士領之得馮道原
任以修復之效未幾馮死時凝和冲妙崇正法師教
門高士九江雷希復搆通眞觀于眞州曰是可任卽
命以揚州道場攝觀事董其役至則料材用之實十
無二三焉乃謁寓公鉅家賈市商舶量錙撮銖以聚
之不足又割通眞之贏以佐之寓材于江伐石于山

徵工役徒畚糞壤正表位早作而夕息悅使而勤省
悉新之廣殿崇陛重門修廊會者在堂燕者在室庖
廩廩庫各安其次鼓有嘉響鐘無厲音神示顧宮倪
耆嗟嘆嗚呼盛矣惟天大建元德啟大宗師懋宣元
化光翼四朝流聲布烈充軼內外授賢任能敷弼宏
教一起高士赫然揚土不亦賢乎昔者老聃氏之在
周也徘徊關吏豈有意廣尸祝而雄棟宇然自古聖
主名臣功烈之及民者咸秩而祀之矧茲道德之隆
乎而余竊有感焉一土木未足多也非知人善任則
百年之廢猶故况其大者耶是役也經始于至大戊

申之冬落成于庚戌之夏贊其事者葆和純素持正
法師揚州路通判上官與齡皇慶元年夏大宗師以
聞降璽書護持雷希復本觀任持提典明年秋屬廣
平程某爲刻辭辭曰道以體求洪荒寂寥道以用著
神人景昭盤盤廣陵淮海攸經翼翼靈宮旣廢而興
惟大宗師手攬元樞握陰抱陽贊我聖符顧瞻海邦
雨潤風飛有勿軌儀爲教之疵矧彼元關通都廣塵
顛而不扶咎孰執焉旣獲其人纘茲戎功巍巍廊深
臣民其恭匪授罔受匪承罔成惟師之明惟雷之能
施於有政豈是此心曷績勿疑曷土勿欽真源綿綿

帝壽如天刻此好辭垂之萬年

雪樓集

元帝觀在小東門內宋皇慶間建

雍正縣志

明眞觀在府治東南隅元道士周源宏建明洪武末副紀張道弼景泰初道士周永芳成化初副紀李永靖俱重修嘉靖間有何道士者日靜坐止誦雷聲應元普化天尊一句倭寇至何出禦不戰却之遂名

參萬曆縣志

祐聖觀凡二一在大東門外運司巷洪武八年道士李一清建宣德七年道士朱眞慶重建一在邵伯鎮元至正間道士王淡淵重建洪武十三年道士符春浩重修二十四年歸併蕃釐觀高宗本維揚志作佑聖道院

同上

增修甘泉縣志

卷之九

寺觀

望

東隱菴在新城興教寺旁

康熙府志

柳蔭菴在興教寺西

雍正縣志

地藏菴在藏經院東蜿紅橋西僧然顯修

康熙府志

三祝菴在新城運司巷東圈門明萬曆三十八年建康

熙四十九年重建

雍正府志

觀音菴在北門月城內康熙二十三年

御書賜留雲二字及金剛經一卷

雍正府志

多寶菴一名多寶館在邵伯鎮東街

樂善菴在大東門外天心墩雍正十一年巡視兩淮鹽政尹公會一爲之記

尹會一古天心墩樂善菴碑記揚州新城拱辰門內松濠畔有墩廣袤三畝許隆起二丈餘世傳晉義熙十四年有梵僧佛馱跋陀羅尊者譯華嚴經于此華嚴經亭亦云尊者別建履淨華嚴之堂因其高爲之蓋亦地靈之所聚自謝太傅有別墅于今新城之北後捨宅爲寺寺域甚廣墩列于前亦屬寺界唐開元十八年上元夜天師葉法善引明皇遊廣寒宮駐五色雲中奏霓裳羽衣之曲下土皆仰矚以爲異明皇亦解所珮玉玦墜之地以識之越數日揚州表奏其事遂名其墩爲天心焉明嘉靖丙辰操江漕運鄭端

簡公諱曉者疏請帑金加築斯城以衛民社始截天甯寺前數百武之地於城內墩遂爲民居雍正六年有天台僧大岳者行腳至墩側誓願苦行十一年運司前街圯眾商請于前觀察范君公舉大岳董修之大岳以石易甃期月成有羨悉還之公貯無所私于是眾皆服大岳之公而能力又憫其無一單之棲遂舉前所貯並各傾助以稍益之迺購天心墩民房一區爲棲息之所余嘉其苦行多成善事顏其菴爲樂善制府趙公且錫扁額以落其成遂爲廣陵名蘭若夫世之崇奉二氏者侈木土壯麗之觀極金碧輝煌

之制徒耗民力無益於人心風俗雖輪焉奐焉君子勿取也今大岳一鉢一餅日以利濟爲事樂善菴之建亦云報也而所營不過十笏又因墩之遺勝本跋陀羅尊者之譯經臺一旦從而復葺之仰遵

皇上加修古刹不使廢棄之

旨然則此菴之勝亦卽此邦之勝大岳將來能於香臺蓮座之側藝竹一林栽花滿徑俾都人士攜筇着屐來遊來歌以寄登臨憑眺之興其有功於勝地名蹟又豈止于一時之樂善好修朝夕禪誦而已哉遂泚墨記之

增修甘泉縣志

卷之九

寺觀

三

藏經院在新城左衛街後石牌樓

雍正縣志

明萬厯間太監魯保請藏經頒示賜額萬壽有碑天啟間僧鎮滿建毘盧閣戒臺于後邑人大理姚思孝爲之記

康熙府志

準提禪院在新城懷遠坊

雍正縣志

三清院在廣儲門外劉家莊

同上

文昌樓在府北儒學前文津橋上雍正五年重建

同上

文昌宮在南門內新橋明萬厯三十七年督鹽政御馬監太監魯保建巡撫遼陽都御史李植爲記崇禎間兵備道鄭二陽重建康熙二十三年邑人王復衡許承宣

承家鼎新之江蘇巡撫湯斌爲記二碑具在宮內雍正縣志

東嶽行宮舊名東嶽廟在拱辰門外有高阜名太山者

其故址也元成廷珪有廣陵嶽宮詩後廢今在新城洗

馬橋居竹軒集

按雍正縣志云明洪武元年居民周滄海遷

于縣治西北四望亭成化間揚州衛指揮李

忠修一在新城洗馬橋南一在縣北邵伯鎮

湖濱洪武二十九年鎮民劉忠建正統十年

姚泰春重修

武當行宮在大東門外臣止馬橋一在北門外郡厲壇

增修甘泉縣志 卷之九 寺觀 四

西 雍正縣志

按嘉靖萬曆府縣志俱作真武廟嘉靖志真

武廟註云一在大東門外宣德戊申郡守陳

貞感冬月見蛇之祥重建正德元年中都商

人葛欽修葺前南京兵部尚書邑人王軌有

記一在北門外元豐樂酒庫建元戊子務官

馮景增新教諭張榮祖有記景泰元年邑人

吳愿思重建嘉靖初道士蔡健清增修其說

較雍正志甚詳武當行宮之名不知何時所

改今臣止馬橋廟中王軌碑尚存附錄于後

王軌真武廟碑記易曰陰陽不測之謂神孟某氏亦曰聖而不可知之之謂神惟其不測然後可測惟其不可知是以可以求知夫神變化妙萬物功顯天下威感生民其惟氣化乎是故四方上下之宇往古來今之宙而神則無在而無乎不在無爲而無乎不爲也然必奠方隅假色像而後人得以神明之北方之神曰元武宋時避諱改稱真武至今因之其像披髮跣足衣皂衣建北斗旗下攝龜蛇含陰育陽往往大顯化于世雖童子男女瞻其像威識其真武也太岳太和山峯林奇勝甲天下說者非元武不足以當之

因名武當洪武末太宗皇帝踐祚真武大有顯功于是大建宮殿于武當山其御製碑記有經營之始迄于告成之日神屢顯像祥光燭天山嶽騰輝草木增色靈氣聚散變化萬狀瑯梅垂實金杵躍出靈異紛紜莫可殫紀於戲是我太宗報功之盛殆所謂有功于民則祀之者顧揚城之東有真武廟聞創自晉代末之詳考父老相傳兵燹於勝國至正戊子至我朝宣德戊申陳貞守揚感冬月見蛇之祥爲之重復建造景泰丙申成化甲午爲之守者王恕周源率以顯靈而敬葺之至是又大圯壞正德元年丙寅中都商

人葛欽因過廟見神燈熒然冉冉入廟而傍之居人亦時或見之神座之下又時見赤蛇周旋變化於是葛欽謀之同商于揚者劉明袁琳程聚惠賢趙儼王傑郝淵張鏗李泉郭成陳諫高洪陳璧吳淮各出資百金信士丁濂陳宗道士周長仙住持朱景良董其工因舊址構而新之周爲甃垣中爲殿前爲獻殿外爲門門內左爲紙爐右爲碑亭殿之旁爲廊廡後爲斗閣閣左右爲廂庖井具焉材木孔良制度惟堅塑像金彩楹丹壁聖煥然奪目而前守鄧公文質今守王公鐸時加董勸而作興焉經始於其年之三月落

成於十月自經始至落成神屢示現龜蛇效靈蓋揚之地東大海西瑯琊諸山長江橫其前蜀岡倚其後其地之靈因以昭感於人所以一時人心僉同踴躍樂助故勿勞而不日成矣眾以碑文屬軌軌爲揚之人以使還得耳其靈跡目其壯麗仰徵之於宸翰則其事不可以不誌詩云神之格思不可度思矧可射思是故使天下人齋明盛服以承祭祀此廟之所以不終廢也則夫神之所以妙化無方亦由此得測而知之矣乎謹用記石立諸亭中俾人知廟之重建有白云

碑在廟中

斗姥宮在北門外紅橋東邑人羅光榮重建康熙四十六年

御書大智光三字額懸宮內

雍正縣志

都天行宮儀真新城神廟碑云元至大初州大疫有孕惠先生者楚人也得其師徵牧公之學由潯陽東遊于儀憐州毗之病以神符秘瀝飲之皆不藥而愈州人德之因爲瓶道宮于新城按此乃神廟所由昉也神後加勅封廟祀甚廣今城內外皆有之

同上

萃靈宮在董子祠側

同上

玉皇閣在邵伯埭明天啟初年東魯道士劉化芳募得

增修甘泉縣志

卷之九

寺觀

七

木料聖像舟載以歸經邵埭風雨波濤大作舟不能前爰營宋羅令祠故址建閣復建羅令祠于閣後康熙二十七年建下院名孚佑菴在尖竹顛

同上

觀音閣在金匱山

新增入

天雷壇在北門外揚州衛世襲拖沙喇哈番樓明鼎與邑人曹尙鈇捐資公建

龍興寺宋僧慧禮建今圯宋王觀芍藥譜序云花品舊傳龍興寺山子羅漢觀音彌陀之四院冠於此州

同上

按嘉靖萬厯舊志及康熙志俱不載此雍正縣志引王觀芍藥譜序爲証其二云僧慧禮建

者蓋據王荆公記而言不知唐時已有揚州龍興寺經律院和尚碑見文苑英華碑爲李華所撰張從申書李陽冰篆額時謂四絕碑碑文中有大起僧坊廣□菩薩等語意寺卽和尚建也

王安石揚州龍興講院記予少時客遊金陵浮屠慧禮者從予游予旣吏淮南而慧禮得龍興佛舍與其徒日講其師之說嘗出而過焉庫屋數十椽上破而旁穿側出而視後則榛棘出人不見垣端指以語予曰吾將除此而宮之雖然其成也不以私吾後必求

增修甘泉縣志

卷之九

寺觀

哭

時之能行吾道者付之願記以示後之人使不得私焉當是時禮方丐食飲以卒日視其居枵然余特戲曰姑成之吾記無難者後四年來口昔之所欲爲凡百二十楹賴州人蔣氏之力旣皆成蓋有述焉噫何其能也蓋慧禮者予知之其行謹潔學博而才敏而又卒之以不私宜成此不難也今夫衣冠而學者必曰自孔氏孔氏之道易行也非有苦身窮形離性禁欲若彼之難也而士之行可一鄉才足一官者常少而浮屠之寺廟被四海則彼所謂材者寧獨禮耶以彼之材由此之道去至難而就至易宜其能也嗚呼

失之此而彼得焉其有以也夫 荆公文集

華林寺唐元和五年釋雲坦居揚州華林寺寺內有大將軍張遼墓寺僧多為鬼物惑亂坦居之寂然無事神僧傳

按唐文粹有賈餗揚州華林寺大悲禪師碑

銘

決定寺見搜神記在揚州 雍正府志

長樂寺續高僧傳云隋釋住力於江都長樂寺建塔五層 同上

開善寺續高僧傳云隋釋法登立講堂於江都開善寺

增修甘泉縣志

卷之九

寺觀

四

興聖寺逮善寺靜樂寺東安寺慧日寺五寺並見唐貞

觀畫史云在江都 雍正府志

孝感寺舊志云唐大師佛于貞元中客廣陵居孝感寺

又牛僧儒幽怪錄載明皇觀廣陵燈事廣陵奏云上元

夜有仙人乘綵雲自西來臨孝感寺奏霓裳一曲而去

同上

慶雲寺見獨孤及塔銘唐詩僧靈一居此寺 同上

開福寺舊志云宋淳熙八年寺之大士殿基產芝三莖

寺今莫考所在 同上

水繪菴寶樹林並見舊志莫考所在 同上

紫極宮通鑑紀事云揚州紫極宮有唐明皇像楊行密每有封拜于像前陳制書再拜然後下

同上

崇道宮宋博士孫邁及贊善潘若冲所建

同上

徐鉉新建崇道宮碑記并序有天地然後有萬物有萬物然後有君臣有君臣然後有教化教之大者當由其本則大道是已夫道積乎中動合於真故能舉堯舜周孔之法奮禮樂刑政之用若道不在焉而守其籛廬則莊周於是糠粃仁義輪扁於是糟粕古書矣夫孝本因心而宗廟簠簋所以致孝也道本勤行而宮館壇墀所以尊道也爲政者有能原聖人之旨

增修甘泉縣志

卷之九

寺觀

五

以垂憲崇列真之宇以薦誠其殆庶乎廣陵大藩四海都會制度之盛雄視諸侯土德旣微三災斯作井邑屢變城郭僅存皇宋膺圖更造區夏雖天寶輔德亦世而後仁今上御極之六年詔太常博士孫君邁理斯郡君服膺古訓得意立關以爲教之不興民之安仰於是相爽塏之地卽清曠之墟創朝修之宮奉立元之御當崇墉之左俯合瀆之東涯出俸錢以易置運心匠以經度班倕方集畚鍤旣興未及僦功移典秋浦同聲之應千里非遙太子右贊善大夫潘君若冲負儒雅之才韞恬淡之量允膺朝選代撫斯民

庶政交修眾能畢舉惟茲靈宇既有成規于是揆日
庀徒克終懿績若乃殿堂陛楯之制閤閟罽毼之列
或躊躕以閑宴或竚籛而曼延眸容肅穆伏衛紛繹
搖太霄之佩植紫旄之節拊洞陰之磬扣豐山之鐘
歛若經闈風而歷琳房飄如排玄雲而楫丹露風亭
月觀之地紫氣浮空歌臺舞閣之基芝英擢秀學者
假筌蹄而有得遊者甘樂餌而斯留藹然福鄉丕變
浮俗既畢雲宇乃揚王庭有詔賜名曰崇道大矣哉
聖人在上陞典咸修自成巽嶺之區何假崆峒之問
是宜刻於樂石紀在方書某也素爲道民常學史氏

以文見屬所不獲辭銘曰大哉道源湛然常在其質
無象其功不宰君子得之勤行不怠勤行伊何啟煥
靈塲乃闢隙荒乃築宮墻峩峩高門屹屹崇堂祀事
孔明元儀載光淮海維揚九州之隩厥民伊何庶富
而教人仰靈暉今知至道咨爾三方是則是效崑岡
北峙邗水南道聖日麗天真氣盤空煒煒煌煌魂魄
熊熊道民作頌永播皇風

騎省集

建隆寺寺在揚州府城天甯門外壽甯街宋太祖建隆
元年以行在建寺崇奉御容卽以紀年爲寺額至道
三年學士王禹偁爲碑記蘇軾鄒浩俱有詩刻聶樂

讀續修指月錄並存寺中

國朝康熙四十四年

聖祖南巡

賜御詩一聯閒雲任棲宿密雨斷飄零奉寺謹

載志乘

乾隆十年藏經館分領校閱僧宗森卓錫於此立南山宗丙辰歲

賜有御選語錄宗鏡錄欽訂教乘法數二十八經等書
恭奉於寺十一年郡紳候選知府議敘加一級黃晟
仰遵

佛心天子加修古刹不使廢棄之旨因闢基重建其殿宇藏

增修甘泉縣志

卷之九

寺觀

至

樓戒壇堂閣與夫聖像器具廊廡庖湍丹墀均仿華
山圖式獨力鼎新掘地得七竅靈源古井及濬泉湧
香甘一鄉可賴兼設前後茶廠樓供銅像千尊並列
八十八祖復給齋田以資僧益仍延森入方丈規制
焚修傳律宏戒爲淮南一祝

聖叢林開千古接眾之勝地云

詩

與幾先自竹西來訪建隆慶老不見獨余君卿詹

知客東閣道話久之賦詩

宋蘇軾

卷卷長廊走黃葉席簾垂地香烟歇主人一往終不來

火紅銷盡如春雪

次俞秀老建隆道中

鄒浩

道人不獨是詩豪
曾把滄溟注一毛
破曉聯鑣訪孤寂
致身如在泰山高

登建隆回呈俞秀老

瘦骨峻嶒聳碧峰
應緣曾住大明東
道吾埋沒今何處
少室分張昔已空
殿閣不移秋際影
松篁猶韻曉來風
爲人微用無人解
借問三生龐德翁

彰武殿對

明鄭一陽

若肯以心究心
梵語唐言成一塊
不妨就路出路春

增修甘泉縣志

卷之九

寺觀

五

風秋月過三祇

補集碑刻

舍利律院在北門外紅橋斗姥宮之左寶祐間建洪武
年僧德雲重葺

國朝順治十七年十月初三日

世祖於景山便殿

御書敬佛二字

賜具足宗禪僧還山

刊額懸大殿雍正四年間思曇如律主係京師瑞應
寺法派先應 多羅平郡王請住洛伽寺次以西山

遺光寺講經傳戒至七年來揚攜同志結蓮社於此
修撰王復衡光祿朱珣等爲外護嗣寶省相繼緣訖
乾隆三年春郡紳候選副使道汪宜晉泊舟攬勝喜

紫荆翠竹之盛獨任重興土木幾載殿樓堂閣百美
具備而爲叢林郡守高公士鑰率紳士諸山請僧曉
聞正方丈位且以岸圃公所施園址剏建戒壇列應
眞於毘盧閣四儀秩肅汪君頻給衣鉢與諸求戒者
咸稱邗上梵刹焉

三清觀

雍正縣志

孝先寺寺有湯悅撰孝先寺碑世宗親征淮南駐蹕於
其寺讀其文贊歎之

馬令南唐書

續志考正孝先寺卽前壽甯寺湯悅文又見碑碣
內

增修甘泉縣志

卷之九

寺觀

五

雍熙寺

天慶寺

三寺新增入按華林以下寺觀並有考據而
其地失傳或在江都或在甘泉今莫可辨康
熙府志於崇道宮以上等寺並派入江都蓋
仍江都之舊也今備錄之以俟博識者釐定
云 以上原志

前志所紀寺觀搜葺甚富雖昔有而今無者並列
其名今考甘泉境內凡鄉村之以寺名者如北湖
之有開元寺傲姑寺開元則屢見於唐劉長卿盧

綸羅隱詩中而前志未及亦難徵信也又西鄉之古井寺邵伯以東之東明西明延壽等寺皆以寺稱其他頽垣斷礎鄉俗流傳間有存者絕無碑識可考証不過粥飯僧安身而已今不並登

重甯寺在天甯寺後乾隆四十八年淮南商公建爲祝

釐之所

御製碑記並

賜額

慧因寺在北門外卽前志舍利律院乾隆十六年

御賜今額

增修甘泉縣志

卷之九

寺觀

五

法淨寺在平山堂卽大明寺乾隆三十年

御賜今額

藏經院在新城地藏菴側明萬曆中太監魯保請藏經
頌寺賜額萬壽有碑天啟間僧鎮滿建毘盧閣戒臺
於後有翰林院姚思孝碑

法華寺在邵北鎮寺久傾圮乾隆三十八年僧悟修募
修其徒達池復于嘉慶六年募修開法坐禪詣 都
請領龍藏全部四體大藏金咒一分供奉後樓

梵覺寺萬佛樓乾隆四十年後建優人岑仙者名噪班
中中年以其貲施寺自稱岑道人賃居寺旁奉母日

則入寺凡宰官善信之往來親與迎禮勸募修舉廢壞增飾亭榭月募歲益矢愿盈數今之縱橫布列于墻壁棟棟者大小殊詭金光爛然溢目皆其二十餘年所營造也

萬壽寺卽前志東隱庵嘉慶二年僧性恬募改創闢叢林內有唐石幢

彌羅寶閣在瓊花觀後乾隆四年燬于火十年商捐重建

碧天觀在鎮淮門外圯壞已久觀前有三銀杏樹百餘年物也修幹挺峙嘉慶元年甘泉典史王汝楨夜忽

增修甘泉縣志

卷之九

寺觀

癸

夢白衣三老人向之乞命醒不能解是日適以事過其地人眾喧嚷則里中無賴子以樹售人將尋斧斤住持不能爭也王入觀見樹恍然有悟立禁止之請于鹽政遂加修輯煥然一新今揚州歲每迎春于此觀爲元時豐樂酒庫地存一小石碣至元戊子年刊文拙書俗紀事而已

秋雨菴在西門外本楊姓出家之地臨潼張氏始構爲菴名曰掃垢精舍又名金粟菴漸次恢拓插籬蒺竹花樹繽紛僧竹溪居之益加修整嘉慶十二年邑紳士建給孤臺拾枯骨彙葬于其側

如意菴在北門外黃金壩本一草庵也乾隆五十六年
鹽政全德改建爲冠蓋往來憩息之所

多寶院在邵伯鎮東街久廢里人庠生戴杏監生龔聯
甲等重修有碑

以上續志

旌忠廟名文選旌忠教寺

阮元重修旌忠廟記曰揚州舊城旌忠廟祀宋統制
魏公俊王公方康熙鹽政曹棟亭寅修之朱檢討撰
碑文載在曝書亭集余謁廟廟毀甚象亦壞碎求檢
討碑不可得豈當時未刻石耶嘉慶十二年秋予鳩

增修甘泉縣志

卷之九

寺觀

七

工重修之立其象設其主與知古好義者祭而落之
法淨寺咸豐三年經兵燹全圯同治十一年鹽運使方
濬頤重建

天甯寺咸豐三年粵賊竄揚僧悟鑑觸石死寺焚燬四
年春僧眞修募造山門禪堂齋厨觀音閣廊房拾骨
塔等處

方濬頤重建天甯寺碑曰揚州拱宸門外有天甯寺
焉宅傳太傅之遺名誌司空之舊古刹夙標於瑩苑
異聞或託於龍宮池有青蓮出青衣而執役園留銀
杏闢銀界而棲禪溯唐代之金輪稱爲證聖迨宋朝

之玉勅易以報恩定名實肇自祥符歷劫重興於洪
武類皆於挂衲繙經之地寓瞻雲就日之思義匪自
今事沿在昔欽惟我

國家期隆三古運邁百王乾符則

歷聖相承泰策則

累朝遞授

聖祖仁皇帝翠華問俗頻觀龍馬之圖

高宗純皇帝黃屋省方屢展崆峒之駕凡先後六巡之盛典
實東南萬姓所歡迎良由勝占地靈仰邀

宸賞前旣乘輿疊幸繼兼

增修甘泉縣志

卷之九

寺觀

五

行館旁通竊嘗恭溯

璇題謹稽

瑤翰法鼓聽魚龍之聚禪心契水月之澄春日長時珠林照
耀好風吹處碧澈滌洞龕雲現其吉祥瓶花資其功
德法輪駐其多寶華蓋凝其衆香阿閣三層表名區
於蜀阜禪枝百代傳妙諦於南天而且地有吟軒天
開畫境笙簧成爲仙籟錦繡入乎化工商鼎周彝聚
奇珍之典重花香鳥語遍生意之昭蘇收烟景於軒
窗清嘉意適聽謳歌於閭里樂愷聲傳洵稱最古花
宮上層蓮界追企

天章之煥采足令佛宇之增輝若夫

御府頒珍

內廷賜冊墨帖擬太清搨出梵經從羅什繙來名畫法書
弄前人之真蹟金章玉質分寶藏之奇觀福字則證
夫九疇佛像則圓夫十行增光明於般若極富貴於
華嚴是又挂帶山門方茲爲陋布金園地比此非多
昔以

行宮之鄰其西也凡祝

聖釐賀正旦官商咸集於斯蓋溫洛表巡方之館成紀傳敷

教之臺合下遽車允虔臯拜自粵氛倡亂江表驛騷

增修甘泉縣志

卷之九

寺觀

堯

蚩尤抗涿鹿之師鑿齒逆伊祈之命揚城不守寺亦
燬焉時也衝飈蕩岳烈火焚山醉象成羣趁海潮而
蹴踏毒龍結陣驅江霧以縱橫遂使金鳳連薨全歸
瓦礫玉虬接棟盡墜荆蕪迨夫薇芑遄征萑苻失勢
軍五步而五伐境三絕而三通可知福地莊嚴非揭
竿所能據也靈巖名勝非探丸所可憑也鎖鑰旣固
於北門星棊卽聯於南國至

今天子踐祚五緯相汁上動祥星九熬聚符下空妖霧剪除
醜類奠定江淮兆氓旣漸來歸僧寮亦稍安輯而珍
臺香闕已非曩日之規玉榜金繩難語昔年之制良

可慨也濬頤忝司都轉移任維揚嘗躋殿址之巍崇儼近

天威於咫尺歲時茅蕝之禮悉仍其前隱微葵藿之忱彌結於內乃就寺之舊址重建大殿暨兩廊朝房官廨外並建金剛殿一切丹堊垣墉毋不加意旃飾至於供張

寶座安設

御屏凡有應需罔敢不備貲則命商以籌之工則擇官以督之所以展私敬肅羣情也夫以揚之古蹟而論廳有芍藥之名園有櫻桃之號墅有芙蓉之額閣有梧桐

增修甘泉縣志

卷之九

寺觀

卒

之稱以及琴室吹臺風亭月觀鬪雞戲馬不少勝區轟雲摘星尤多傑構新泉煮茗則春貢留亭幽徑踏沙則秋聲題館莫不動行人之感觸生過客之流連而惟此紺宇岩巖琳宮摩谿實繫循牆之慕難忘拜闕之儀今者八會窮源重開舍衛三明極地再演迦陵聆梵唄於牆東依然香界聽鳥聲於樹杪仍是禪音藉爲

宸極之瞻兼作

奎文之溯從此瑤函玉簡聚宇宙之祥暉寶網珠幢迓天人
之勝福法雲遠蔭卽

湛露醲敷佛日長明卽

皇風永暢十洲澄鏡八紘靜塵垂髻戴白之倫共登極樂西
費南琛之屬大會無遮喜氣洽於寰中威靈震於遐
外况斯寺爲東山舊業洞庭古居泚水凱歌化兵形
於草木錢塘武樂演陣勢於雷霆賓迦所以潛蹤修
羅於焉匿迹但宏願力具足神通是則獅吼座前能
助珠囊之珍祕龍降鉢底益成玉燭之和甘不尤爲
臣民之所祈祝者哉

梵覺禪寺同治六年重修

贊化宮在舊城前李府街宮本樂仙壇舊址道光四年

增修甘泉縣志

卷之九

寺觀

空

鹽政曾煥改建贊化宮祀孚佑帝君正陽帝君皆沈
香金像咸豐三年粵賊陷城神像未燬同治九年道
士趙一峯稟請鹽運使方濬頤重修於後殿塑立金
龍四大王神像十年於廟西購地建龍王殿祀行雨
龍王神像及風師雨師諸神旱潦並祈禱於此
曾煥贊化宮碑記曰贊化宮者揚州新建奉祀呂祖
之所也呂祖自宋政和初顯著靈應詔封真人元代
累加真君帝君之號祠宇遂遍天下我

國家崇報幽明凡有功德於民者皆列祀典嘉慶九年南

河有大工繫惟呂祖之靈旣安旣固河臣列上其事

仁宗睿皇帝特加燮元贊運封號崇祀淮浦並詔各省原立廟宇一體奉祀呂祖之靈益顯著於海隅揚州屬邑類皆有呂祖專祠獨郡城向祇附祀於南門新橋之文昌宮不蠲不肅不稱

朝廷咸秩無文之義

皇帝建元之明年煥來視淮巇展謁致敬俯仰興慨輒議改建越二年乃與都轉運使張君青選郡守黃君在厚暨署江都令萬君承紫甘泉令盧君雲亭捐金倡始度地構屋距新橋不一里所有乾隆初河帥高公斌所建樂仙壇故有呂祖像爲前使者高公恒所奉因

增修甘泉縣志

卷之九

寺觀

三

卽其址鳩工庀材擴其堂廡翼以奧胙棖題丹碧奐焉具舉以是歲五月興工閏七月工竣嘗謂神仙之事其源出於道家而支分派別乃有方術符籙之說然考自書契以來傳記所載上自廣成赤松之流下及後代文士所述如許旌陽陶隱居登真度世之士莫不根極性命原本忠孝濟民利物陰翊王度固不僅以脫屣塵濁爲高長生久視爲樂而一切俯視人世如蟻蠊蜉蝣不一動其心也然功德之隆未有如呂祖者呂祖自唐迄今傳其遺迹者多鉅公鴻儒言可徵信大抵以神仙之願力行聖賢之博濟而非有

方術符書之迂怪莊生所稱博大真人者庶幾近之
聖朝對越懷柔百神受職而世外高真默契夫下風問道之
心以宏施其禦災捍患之力上膺

睿鑑用飾徽稱雲漢昭回光炳日月江淮人士所以沐

聖澤而迓神庥者皆於是乎在於以齋莊志氣昭報肸蠁誰
曰不宜燠以非才再蒞此土敬勒貞石告事之成俾
後來者永永無怠乃係以銘曰

聖人御宇奠八極海若河祇各率職崆峒仙駕世雖隔能以
神功佐

帝力於維仙靈著在昔佑我

壇修甘泉縣志

卷之九

寺觀

三

昌期底厥績真靈位業自

天錫江淮萬姓宅爾宅神人之功妙無迹金璫玉佩光肸飾
鈞天帝所來下國道然眷此闕宮徯報祀千春庶無
斃以上府續志

觀音菴在宛虹橋石牌樓創自前明萬厯庚辰僧越輪
募建

大悲寺在永安鎮康熙二十一年江都縣熊督捕廳王
重修有牌記殿後有古杏四株結實無心旁爲映奎
精舍又有唐建中中書德水智燈匾額

慈蔭菴在陳家集東北明里人于卜明建康熙年間里

人重修繞屋老梅十餘樹林小桐題額曰暗香疎影
相傳卽明季雙清閣舊址

文昌閣在公道橋北五里卽斗壇基址康熙四十三年
建同治十二年里人阮先等重建邑侯李修梅有記
三義閣在大儀集西相傳前明馬神廟故址康熙初里
人見有三人入廟追跡已杳後改爲三義閣上有靈
宣古鎮匾額阮文達公書

魁星閣在公道橋鎮東道光三十年里人重建阮亨有
記

天后宮在陳家集南阮文達公

增修甘泉縣志

卷之九

寺觀

畚

予告歸里後因民居改建內有望楣軒以后曾修道於福建
之楣嶼文達公撫浙時征安南海寇得神庇獲捷因
以名軒

觀音寺在城北見北湖小志咸豐戊午寺被賊燬里人
楊澍捐資重建

北湖火星廟一在公道橋同治十年重修一在黃珏橋
光緒元年重修

傲姑寺

焦循記曰寺以傲姑名甚奇里人云露筋祠祀其姑
傲姑寺祀其嫂昔姑嫂避亂湖干夜苦蚊嫂投旁舍

宿姑不肯遂死於蚊論者貞姑而醜嫂然嫂之貞實與姑等有爲嫂白其枉者建寺以傲姑名是說也不可以爲典要雖然吾有感焉姑潔身遠嫌其名顯嫂不爲矯情以沽譽其聲惡旁舍豈必強暴露處豈不可汗夫姑之行魯國男子之行也嫂之行顏叔子柳下惠之行也各行其志矣何傲爲寺在赤岸湖東偏湖水橫濶沙嘴錯綜夜黑風起舟子不知所適每苦於溺昔人於寺側樹高竿懸紅燈以指舟之迷寺僧設湯粥以濟舟人之寒餓故寺之所關甚鉅而不可廢或曰姑音近湖爲傲湖之譌謂有寺以避風濤則

增修甘泉縣志

卷之九

寺觀

奎

湖失其險或曰傲姑者始建寺之人然皆不可考也嗚呼露筋者驛名也或曰露涇或作鹿筋或作路金或謂蚊嘍鹿或謂蚊嚙醉人今隈岸草間有宿者不聞其殺於蚊且古今同此蚊蚊嚙人何至血滴筋露則姑之事且不可知而嫂之事又何深辨乎惟水溢寺圯燈竿久廢舟中之迷莫有指者吾願里之君子重修以濟可也

北湖小志

紫竹庵在公道橋北宋家橋南光緒六年里人阮充等重修

東嶽宮在公道橋西北二里康熙間進士陳元度等重

修

小司徒廟在公道橋北鄉道光乙巳年州同談春元重修兵燹燬於火至同治元年里人重建有碑記

以上新增

增修甘泉縣志

卷之九

寺觀

奕

古蹟志 上

邗溝城

哀公九年秋吳城邗溝通江淮 左傳

城在州之西四里蜀岡上 太平寰宇記

續志考正俱已見城池內

廣陵城

楚懷王槐十年城廣陵 史記六國表

城在府西之東北秦置縣二世二年廣陵人召平為

陳王狗廣陵是也 讀史方輿紀要

廣陵吳王濞所都城周十四里半 後漢郡國志

增修甘泉縣志

卷之九

古蹟

一

五鳳二年七月使衛尉城廣陵 三國志

太和四年十二月桓溫城廣陵居之 晉書本紀

續志考正亦見城池內

廣陵故城在府北一十八里楊吳時嘗分江都置城

於此 太平寰宇記

郡城吳王濞所築然自漢迄於晉宋 廣陵郡圖經

宋大明三年竟陵王誕據廣陵以叛詔沈慶之攻之

克其外城進克小城 讀史方輿紀要

魏文帝黃初六年親征幸廣陵故城及旋師留張遼

屯江都 文獻通考

胡三省曰魏曹丕登廣陵故城卽蕪城也通鑑注

太建五年九月左衛將軍樊毅克廣陵楚子城陳書本紀

鮑昭登廣陵故城作蕪城賦四言集 鮑賦別見藝文

鮑昭爲臨海王子瑱參軍子瑱行不軌昭爲蕪城賦

以風焉廣陵雜詩序

李滢後蕪城賦原夫斗野攸分楚甸載闢襟帶江淮控引蠻貊輕揚紀於職方詰竄稱於史冊其盛衰得失之故見於齊梁以前者明遠之賦言之詳矣隋氏代興南北混一煬帝篡奪志在淫佚乃鑿汴渠爰達江國錦帆龍舟千里蔽塞遼左喪師江都是卽罔念

增修甘泉縣志

卷之九

古蹟

二

瘡痍敢號饑溺項昇獻制遂造迷樓金楹玉柱蓬島丹邱齊雲落星不足比臨春結綺未堪侔吳姬越女皓齒明眸服則鮫鮪火浣食則海錯山羞朝吟蛺蝶暮彈箜篌花作剪綵之戲曲名清夜之遊大業之末四海怨叛歌吹成空干戈脅亂燄吐凌風之臺草荒却月之觀愁鴟嘯夫玉鈎飛鳶啄夫金彈李唐御宇重鎮肇興鹽鐵轉運俱治廣陵高檣巨艦畫戟彤旌逮於中葉殷盛日增青楓拂乎曲巷綠嶼映乎雕甍織腰間夫長袖玉佩雜夫繁纓香藹芙蓉之帳花園雲母之屏管絃達旦兮別院燈火不夜兮層城揚一

益一誇美汗青安史煽禍五季嗣作舞榭淒涼歌臺
寂寞高陽之間兵火相錯青燐火兮迎仙之樓碧土
花兮延和之閣嗣宋室之開基號富完而安樂倏中
葉之播遷遽淪陷夫河洛憶靖康之駐蹕暨完顏之
肆虐飛礮碎兮綺羅箭鏃叢兮簾箔灣頭之哨馬幾
過制置之孤軍被縛遺骸零亂於邱墟戰血漂流於
城郭千載聞之涕淚爲落明興甯宴近三百年大農
資漕渠之飛輓縣官賴鹽筴之貿遷輪蹄輻輳商賈
喧闐朱樓十二粉黛三千春花旖旎秋草芊眠流蘇
晝掩水沉宵燃締新觀而密勿懷往眷而纏綿至於

增修甘泉縣志

卷之九

古蹟

三

水湧皓月山銜斷雲修禊競渡士女繽紛嗣法曹之
逸響廢枚叟之雄文憶曩日之繁盛每夢遶於蘭薰
啟禎之末寇盜四起燕都不守強藩至止兵日驕淫
民盡瘠痕蹇蹇史公盡瘁國事鐵騎驟馳雉堞倏燬
碧血濺於川原紅顏淪於邊鄙至於今日荒烟遍野
旅穀盈庭鷄臺之綠蟻誰泛螢苑之青莎自生豈非
樵蘇所酸鼻詞客所傷情哉爰爲歌曰江淮灌注古
維揚兮龍舟鳳舸侈隋煬兮玉簫水調流風長兮燼
滅烟消日淒涼兮狐烏夜號告不祥兮忠貞淪沒民
流亡兮抗懷千載徒茫茫兮

康熙府志

按鮑照蕪城賦自注云登廣陵城作當時漢魏以迄晉宋俱名廣陵自竟陵之亂城邑荒蕪故照作賦傷之非別有一城也趙鶴以為劉宋時城恐誤

張公城

城在府西四十里東漢桓帝時廣陵賊張嬰所築張綱為郡守乃單騎造賊壘而示以恩信嬰悅服歸降即此處也 讀史方輿紀要

新城

揚州府城北一十八里 通鑑綱目注

增修甘泉縣志

卷之九

古蹟

四

府北二十五里

讀史方輿紀要

太和十年謝安出鎮廣陵之步邱築壘曰新城

晉書本傳

宋德祐二年李庭芝固守揚州蒙古元將阿朮遣兵守高郵寶應二處以絕餉道而博羅歡又拔新城以逼之即此也 讀史方輿紀要

輿縣城

府西四十五里漢縣入臨淮郡後漢入廣陵郡晉因之宋元嘉十三年并入江都縣 讀史方輿紀要

續志考正按輿在漢為侯國宋書符瑞志元嘉二十五年廣陵太守范邈上言所領輿縣二十五年

尚存則非以十三年并入江都者

周小城

周世宗時揚州城爲吳人所毀詔發丁壯別築新城
命韓令坤爲修城都部署 宋史本傳

廢廣陵縣城

縣在揚州北一十八里本江都縣地宋武帝析置 太平

寰宇記

在揚州北一十八里劉宋時置宋熙寧五年省入江
都 明一統志

續志考正廣陵本秦縣中間廢而又復非自劉宋

增修甘泉縣志

卷之九

古蹟

五

析置也

宋大城

揚州城舊有大城又有子城亦曰牙城楊行密據揚
州改牙城南門曰天興其後楊溥僭號稱爲都城 城邑考

城在府城東周圍二千一百八丈小東門南至大東
門八百一十丈高一丈八尺濶六尺大東門至大北
門八百一十八丈高一丈六尺濶五尺大北門至小
北門一百六十四丈五尺高一丈三尺濶六尺小北
門至西門一百四十五丈五尺高一丈五尺濶六尺

西門至新城濠邊一百七十丈高一丈五尺濶四尺

嘉靖維揚志

建炎三年知州郭棣以舊城勢卑爲虜襲瞰請卽遺址增築今城東北二門遺址尙存北濠卽今柴河其上城基培塿可尋南濠卽運河今云蔡家山者相傳其南角樓也東門在東水關內古家巷北嘉靖中以築新城居民利其地爲厯遂白當道撤其址使百年城隍遺蹟蕩不可尋訪古者不無餘慨焉

萬厯縣志

寶祐城舊名堡城

城在府北七里周圍一千七百文遺隍斷塹隱隱可

增修甘泉縣志

卷之九

古蹟

六

尋卽隋時迷樓之故基也宋寶祐四年賈似道奉詔築所謂包平山而瞰雷塘者後又築新寶二城相連名曰夾城

讀史方輿紀要

揚州寶祐城賈秋壑開闢日築申省狀云計厥費爲褚一千三百餘萬米九萬五千餘石錢穀之間不及廟堂皆某連年銖粒搏節迄濟斯用又云照得此城高深廣袤無異一郡舊名堡城不當用旣廢之名今名寶祐城是役也用軍三萬人日羹飯三頓支擔索扉屨等錢五日小犒十日中犒一月大犒有違令者以軍法從事重則處死賞罰必信無敢謹謹始于二

年七月十五日至三年正月二十日告成

庶齋老學叢談

隋開皇初改廣陵為揚州即今寶祐城周三十六里因吳王濞之都也今揚州城乃後周顯德五年于故城東南隅改築周二十餘里大市東南角俞生家穿井猶有船板元揚州路學採芹亭後開阬得岸椿杉羅木教授劉青溪取為器用郡城因革塞河道平邱阜成街市理勢然也如開明橋之類皆因舊徙置同國朝費錫琮揚州寶城詩千株松栢綠陰斜烟霧年深隱翠華清晝每來山寺雨黃雲不到野人家離宮歲歲啼春鳥輦道蕭蕭落暮花取次凭高南望處塞鴻

增修甘泉縣志

卷之九

古蹟

七

飛過隔江沙

費厚蕃詩集

平山堂城

平山堂瞰揚城元兵至則構望樓其上張車弩以射城中李庭芝乃築大城包之

宋史本傳

章臺宮

江都王建遊章臺宮令四女子乘小船建以足蹈覆其船四人皆溺一人死

漢書易王非傳

隋江都宮

宮在江都縣北五里今為上方禪寺

輿地紀勝

宮在故廣陵城內煬帝所築宮也其宮城東偏門曰

芳林又有元武元覽諸門皆宮門也中有成象殿及
流珠堂諸處

讀史方輿紀要

國朝汪洋隋宮賦試覽遺都膺膺荒原叢邱纍錯灌莽
芊綿遐周四極心愴眸酸痛殷墟之黍離憶魯殿之
歸然考黃圖之禁籞迷蔓草兮寒烟詢蒼黎兮野宿
庶彷彿以摭言云世遠而代更迭紛夸而遞傳亘修
隄以對截實象魏之雙懸躡鱗坂之陂陀斷右臂於
頽垣旁臨九曲藻荇淪漣轆轤罷汲淒涼井智突矗
迷樓蜀岡之巔慨當日之侈構謂卽可以迷仙悲玉
鈎之幽沉葬羅綺與釵鈿眺雷塘之巨浸波滉瀟而

增修甘泉縣志

卷之九

古蹟

八

際天指螢苑與雞臺輔蕪城之西偏列崇阜之延袤
皆離宮之廢阡每歲歲而耕耘獲金龜與古錢悼陵
谷之幾墟猶大業以紀年是皆土著之臆習烏覩上
世之愚賢予因感怵撫心茫然追維全盛四海肇興
文皇搏儉億兆底寧處富必驕持滿則盈鮮皋夔以
翌贊遂淫佚於丕承旣辱師於遼漠復黷武于邊庭
耻污巖於倫常服幽縶於天刑疏息壤以引汴水掛
錦帆而幸廣陵於是瓊宮雲蔚丹闕霞蒸金缸夜照
燭龍曉升窮千門兮萬戶竭土木之精英阿房井幹
莫之與京遴率土之殊色充嬪御於掖庭脂棄水而

成膩香結霧而常疑呈歌進舞考鼓鏗鐘恒思傍輦
減願當熊望至尊之一顧終老死而未逢舉六合以
自奉尙不足於侈衷一旦烟塵四起土崩瓦析精喪
志昏顧影汲汲鳩毒宴安變生肘腋斫鏡中之頭頸
懸仗下之鋒鏑天厭獨夫宇文肆逆身膏草莽國化
荆棘審兩朝之治亂能不致慨于今昔遺馬鬣之一
坏增弔古之太息蜀岡嵯峨寒塘自波樹蕭森而環
衛流嗚咽而鳴珂弔落日之山鬼吹陰風之女蘿颺
颺引類狐兔聚窠蛙翻水調之曲鳥唱木蘭之歌林
葉酣霜綴侈心於彩樹野花競笑鍾芳魂於翠娥碧

燐帶雨而愈耀飛螢飽露而滋多似甲煎之常焚照
夜宴于山河憶昔春陽裊裊垂楊金隄燕巧紫陌鶯
狂拂輦路而條柔撲羽蓋而花香值上苑之春明助
眉痕于曉粧今焉顛顛凋零道旁鴟宿樹而淒號蟬
抱葉而悲涼孤瘦歲結冷魅宵防哀農人兮樵子曰
斧斤以見戕歎野木之無情會流入于宮牆嚙枯槎
于崩岸漂斷輦兮浮蔣楚雲悠悠取鑑迷樓難銷往
恨常含古愁不見珠簾兮畫棟但聞鳥雀之啾啾驅
牛馬而向夕橫牧笛于清秋望翠華之不返悼來者
之追遊讀苔碑兮蘚碣恒宣醜而吞羞吳山逶迤列

岫參差送亡國兮千載惟蒼翠而不移月穿荒塚豈
同珠襦玉押之地風號僵木如吟稽顙接踵之詩當
日御溝之鳧雁化爲桔槔之污池緬想袞衣與玉食
散作烟燼兮雲絲伊昔朝班之劍佩祇餘禾黍之迷
離嗟一代之竹帛付秋耒兮春犁別有離宮絡繹某
萸竹西會奉御幄以宸遊今爲梵刹與禪棲瞻金仙
之炬赫儼法駕而受釐覩幡幢之飄舉訝鹵簿之蕨
蕤唄寂山空宛似肅朝之候鐘鳴谷應恆如待漏之
時信塵世之泡幻等昆明之劫灰彼秦宮兮漢時雖
異轍而同歸慙顛蒙其何識敢載筆以敷詞心獨感

增修甘泉縣志

卷之九

古蹟

十

夫興廢聊申臆以抒悲

康熙府志

明孫蕡江都宮詩伊昔隋家全盛年周陳部曲按三
邊端門徹夜笙歌合琪樹經春錦繡纏經春錦繡何
搖漾別有迷樓九霄上鬪井連營次第開珠簾繡柱
森相向樓中美女花葱蘢寫翠圖黃照碧空璧月瓊
花新態度臨春結綺舊丰容碧山螢火光於電更傍
沉香山底宴窈窕清歌來夢兒輕盈妙舞蓮花旋行
樂還來爛熳遊天京移蹕望揚州高起離宮連鳳闕
斜穿汴水入龍舟龍舟錦纜映牙檣玉簫金管紫雲
長仙禽自脫葦蕪羽野鳥還爲鸞鳳翔棹歌楊柳春

風晚扇影芙蓉秋露香芙蓉秋露香飄玉臺榭俄成
走麋鹿翠華夢斷雷塘路鐵馬聲喧太行麓遼東浪
死鬼啼道馬上夜遊誰度曲燕泥時自落空梁庭草
無人隨意綠繁華堪羨更堪憐高塚麒麟若個邊古
路斜陽懸木末寒鴉流水遶邨前荒基遠對唐陵樹
斷刻猶存大業年往事悠悠誰與共臨風爲爾一潸
然

西菴集

按隋書辛公義傳煬帝卽位揚州長史王宏
入爲黃門侍郎煬帝紀大業元年三月庚申
遣黃門侍郎王宏往江南採木造龍舟何稠

增修甘泉縣志

卷之九

古蹟

十一

傳煬帝將幸揚州命稠營造輿服羽儀送至
江都張衡傳大業四年勅衡督役江都宮並
無勅長史王宏大修江都宮之語唯大業拾
遺記載其事而舊志以隋書爲證不知所引
何書爲隋書也且宏于大業初爲黃門侍郎
不應仍稱長史矣宏無專傳又附見他傳者
事亦絕少新舊諸志或別有徵引耶

顯福宮

宮在府之東北乃隋時城外之離宮也宇文化及弒
煬帝奪江都舟楫行至顯福宮武賁郎將麥孟才等

謀誅化及不克卽此 方輿紀要

隋十宮

十宮在縣北五里長阜苑內依林傍澗因高跨阜隨地形置焉並煬帝立也曰歸雁宮回流宮九里宮松林宮楓林宮大雷宮小雷宮春草宮九華宮光汾宮是曰十宮 太平寰宇記

續志考正十宮後又別出長阜院今新刻寰宇記僅有九宮無楓林之名

楊行密宮

楊吳時故宮在舊子城之內 讀史方輿紀要

增修甘泉縣志 卷之九 古蹟 三

楊行密宮在興教院 輿地紀勝

續志考正楊行密宮後又複出楊行密故宅

周世宗行宮

顯德五年二月庚午在揚州宴於行宮三月庚子以江南內附文武從官稱賀宴於行宮辛丑宴於瓜步行宮江南兩浙朝貢使皆預焉庚戌宴從官及江南進奉使於行宮四月壬子朔駐驛揚州江南遣使進買宴錢二百萬仍遣伶官五十人俱來癸丑召從官及江南進奉使馮延巳以下宴於行宮江南僞臨汝郡公徐遼代李景捧壽觴以獻仍進金酒器御衣等

甲寅駐蹕揚州宴從官及江南吳越進奉使于行宮

冊府元龜

宋徽宗行宮

靖康元年二月徽宗至揚詣章武殿行香士民迎鑿

乞駐蹕揚州時已定議南渡京口乃留后妃諸王揚

州辛酉駕旋幸山光寺 明陸弼雜志

宋高宗行宮

建炎元年七月詔仲荀奉元祐太后如揚州六宮及

衛士家屬皆從迎奉神主赴行在十月帝如揚州 宋史

建炎元年七月二十一日戊申元祐太后及六宮至

增修甘泉縣志 卷之九 古蹟 三

揚州正衙牌曰車駕巡幸駐蹕之門 三朝北盟會編

徐知誥宮

昇元四年十月乙巳詔幸東都十一月乙丑宴羣臣

於崇德宮故第也 陸游南唐書

續志考正徐知誥宮後又複出徐知誥故宅

元鎮南王宮

在城西北六里大儀鄉 萬曆縣志

世祖至元二十一年封子脫歡鎮南王於揚州 元史

泰定三年十一月戊午封諸王鐵木兒不花爲鎮南

王鎮揚州 續資治通鑑後編

續志考正元史諸王表內世系殊詳不止二人

顯陽殿

廣陵王胥置酒顯陽殿召太子霸及子董訾胡生等

夜飲

漢書列傳

成象殿

大業二年正月帝御成象殿元會設庭燎於江都門

朝諸侯成象殿

大業雜記

續志考正已見前江都宮內

水精殿

煬帝於江都宮置水精殿令宮人戴通天百葉冠子

增修甘泉縣志

卷之九

古蹟

十四

插瑟鈿及皆垂珠翠披紫羅帔把半月雉尾扇鞞瑞

鳩頭履謂之飛仙

中華古今注

章武殿

宋仁宗皇祐三年初通判滁州王靖言太祖擒皇甫

暉於滁州太宗下劉繼元於并州真宗禦契丹于澶

州宜立原廟三州以昭遺烈于是命工寫三聖御容

遣使奉安逐州神御殿而揚州建隆寺舊奉太祖容

其殿曰章武

通畧

崇政殿

建炎二年二月高宗策諸郡奏名進士于崇政殿皆

借署之名也

中興繫年錄

光慶殿

昇元四年十一月乙丑以廳事為光慶殿庚辰改東都文明殿為乾元殿英武殿為明光殿應乾殿為垂拱殿朝陽殿為福昌殿

陸游南唐書

崇元殿光慶殿後改崇德宮英武改明光應乾改垂拱文明改乾元朝陽改福昌皆南唐殿名並在揚州

王士點

禁扁

按馬令南唐書稱天祚三年冬十月知誥受吳禪以廣陵為東都當時即舊第為宮殿故

增修甘泉縣志

卷之九

古蹟

十五

崇元光慶諸名皆屬揚州舊迹也

宋郊壇

壇在大東門外法雲寺

輿地紀勝

建炎二年十一月二十三日壬寅就江都縣築壇南郊大赦天下

三朝北盟會編

上林苑

大儀鄉有上林苑又西苑杜牧之紅霞一抹廣陵春指此

名勝志

唐杜牧隋苑詩紅霞一抹廣陵春定于當筵睡臉新却笑喫虧隋煬帝破家亡國為誰人

樊川集

長阜苑

在縣北五里煬帝所建十宮皆在苑內 太平寰宇記

續志考正已見前隋十宮內

螢苑

大儀鄉南三里唐杜牧之有秋風放螢苑句 名勝志

元陳旅放螢賦蕙草暮闌暑除皇歡洽清夜徂命合
宮侍燕胥出紫房背椒除金吾輟驚鳳燭成行渴兔
灑塵飛蓋飄揚萍駕神移椒蘭夕香千衛百騎乘堅
驅良左駿驥右步光幸帳殿臨鞠場離宮榮觀息宴
無方易牙割烹儀狄挹漿蘭穀如陵桂酒如江鵠漏

增修甘泉縣志

卷之九

古蹟

十六

向丙宸賞未央皇帝惡丹燭之易銷惜照車之未遠
顧碧珪之鮮曜恨金苔之燄短明月罷懸夜光不展
怨白鳳之不來慕燭龍之遠攬乃有黃門持橐園吏
荷囊挾丹鳳馳乘黃於是綠水罷歌艷舞離牀循桂
道出蘭堂步神皋歷重崗比竹無聲蓄軫山陽門燎
轉遙圍燭收光裂囊解橐從風直上亘地彌天光焰
百丈聯輝接艷互滅齊明魏璞分華漢井流螢玫瑰
奪燄火玉辭榮白虹貫月列火爲城齊連枝之鐙樹
配照夜之金精鞞鞞酣酣前後千乘熏夕幽元萬象
且彰所覲惟何人間天仗華旗孔蓋金瓌琳琅犀羈

馬勒綉鞅玉環璫鸞搖裔飛屑焜煌文茵毳幙風動
帷裳元馬如龍執戟如霜女騎連鑣金碧相望巾幘
輕明微見花房鬟列四枝釵分三子華鞋瓊帶光連
顰悅紺袖分明碧吐花裙釵猶殘紫海口口水於是
乍離乍合將留將去繞雉扇而如縈綴流蘇而欲舞
映橫帶之萬釘耀盈腰之三組拂瓊弁而懸纓投羽
衣而及屨思拔貂而遽脫已入懷而徑度桃驂振迅
皇駁驚疑金盤陀兮照夜青腰裏兮頻嘶鴉鴉忘明
鷄人輟晷顧鳩鵲之失枝誤宮鴉之亂起於是離宮
傳燭乘輿言旋鵲籥夜開入宮下輦餘歡未畢影娥

零亂戶挾露囊人操紈扇金屋遲明銀牀拾焰帝乃
乘宮車臨昵殿工登歌御三飯傳杯授簡以命絳仙
吳姬再拜而言曰邱園弱息草萊餘燼周旋蘭掖出
入椒闥待詔後車策名清禁沐浴春陽天慈光被榮
添楚艷恭逢漢侈近君王之密坐思捐摺兮燔翳同
明璫之在掌方契刀之處囊非孤遠之有耀被天子
之清光恐烟霄之失路委蔓草之荒涼願回霜而收
露幸長近乎太陽乃作歌曰赫赫皇暮赤精子瀉瀉
化成光萬世銀釭未冷戒鳴鷄幾度金苔委丹地綺
錢青瑣進疏囊堯禹世人同寸晷長秋宮中涎涎尾

漢以炎火烏用水於是皇帝作歌綢繆宛轉謂侯夫
人起而爲亂亂曰天威燁耀景化行英姿四照宣皇
明紫脫華秀泰階平百王仰鏡萬世榮螢鑿增輝若
木英光啟玉度垂休聲帝乃歌曰舞玉梢兮歌發梁
歌倚瑟兮行羽觴龍惱寒烟五成帳玉華零落珊瑚
牀愛丹鳥兮往來照榆徂兮繁縟光華夜繞瓊樹珠
莫向璿宮妬銀燭長門懸月照阿嬌共聽天子無愁
曲六宮聞之皆稱萬歲

鹿皮子集

張翥螢苑曲楊花吹春一千里獸艦如雲錦帆起咸
洛山河眞帝都君王自愛揚州死軍裝小隊皆美人

增修甘泉縣志

卷之九

古蹟

六

畫龍鞭汗金麒麟香風搖蕩夜遊處二十四橋珠翠
塵騎行不用燒紅燭萬點飛螢炫川谷金釵欲度苑
中來寶帳香迷樓上宿醉魂貪作花月荒肯信劍戟
生宮墻爛斑六合洗秋露尙疑怨血凝晶光至今落
日行人路鬼火狐鳴隔烟樹腐草無情亦有情年年
爲照雷塘墓

蛻菴詩集

